

THE CHURCH
OF
THE BIBLE
(BIBLE IN ASEI HOUBUNG)
(IN KUKI)

by

J. C. Choate

Translated by

Peter Thien Kho Let

Church of Christ, Myanmar.

(အသင်းတော်အတွင်းကန့်သတ်)

A SUNGA THU UM HO

- Simmun Khat : Houbung a altha
(Meaning of the Church)
- Simmun Ni : Houbung hungum doh dan
(The coming of the Church)
- Simmun Thum : Houbung kitundoh kipat
(The Establishment of the Church)
- Simmun Li : Houbung limso dan
(Identity of the Church)
- Simmun Nga : Houbung Min
(Name of the Church)
- Simmun Gup : Houbung kiloikhom na
(Organization of the Church)
- Simmun Sagi : Houbung Lut'na
(Entering the Church)
- Simmun Giet : Houbung Houdoul
(Worship of the Church)
- Simmun Ko : Houbung Natch
(Work of the Church)
- Simmun Som : Houbung kipum khat na
(Unity of the Church)
- Simmun Somle khat : Houbung Tahsan pomdan
(Creed of the Church)
- Simmun Somle Ni : Houbung Thusim
(History of the Church)
- Simmun Somle Thum : Tu khang Houbung
(The Church today)

SIMMUN KHAT
HOUBUNG A ALTHA
(MEANING OF THE CHURCH)

Bible in aseï Houbung thudoul hi koïman neil thei ponte. Ahin, koi houbung ham? Itobang houbung ham? Ipi houbung ham? Thudoh tamtah aum theiye, Kicheh tah'a donbut thei ahi. Hi jehchun houbung kiti ipi ahi, holdohu hite.

Tun, Houbung hilou ho chu sei masau hite. Bible in Houbung hi Catholic, Protestant (ahilou le) Jewish (Juda) houbung atipoi. Poul-Loitum, loitum sunga kiloi khom, tahsan dan kibang loitumho chu aseï ahipoi. Chule leiset lam kivaipoh na (political organization) chule chutabang mihem lam kivaipoh na dang dangho jong ahideh poi. Lei set lam thila kikhop na inn(mun) jong ahipoi. Chutabangho chu ahitheï louleh ipiba hiding hitam?

Mipi atamjon Houbung hi ahethem pouve. Ajeh chu Houbung ipi ahi, ahelou jehu ahi. Chuti ahijeh chun amahon Houbung doile tup, athupi dan chule anatoh ahepouve. Ahin, Bible in eiho chientah in Houbung thu eisei pehuve. Houbung kiti paochang hi Greek pao "ekkleisia" kiti a kon hung ahin, "koudoh ho" tina ahi. Hijeh chun Houbung hi mi akikoudoh ho kiloikhom na, Vannoiya kona ngai lut chapa lenggam a dinga kikoudoh ho" kiloikhom na tahsa pumpi (body) ahi.

(Col. 1:13). Hiche hi Khirsta Lhagao tipum -tahsa - (Spiritual Body of Christ) ahi (1 Cor. 12:27). Khrista thumang (jui) ho a kon'a kisemdoh ahi (Heb. 5:8,9), hijeh chun ama'a kon huhhing achangun, Aman A Houbunga abelap'in ahi (Mark 16:16, Sol. 2:47). Lamkhata seidin Houbunga hi Khrista nungjuiho jieng jau ahiuve.

Houbung (Church) kiti thuchang hi Bible sunga thuni (2) in akiphoundoh (alang) in ahi. (Universal sense) - hiche hi alhangpi'a manchah mijouse hom'a kimang kisei ahi. Khrista'n alungsunga um anasei, "nangma Peter nahi, hiche songpi chung Ka Houbung kasahdoh ding ahi, hichu mithi khulkot hon anehjou lou ding ahi ati (Mat. 16:18). Hitabang kampao-Houbung kiman chahna Bible chang tamtah aume. Houbung kiti alhangpia kisei vannoiyah muntinah akimuthei ye. Hichu Bible in ase, Jesun ase Katun doh ding ati, a Houbung chu ahi. Nina(Local sense) - hiche hi amun Houbung in amun in akiseijin ahi. Tekahin mithieng Paul in Rome a um Houbungho dinga lekha ajih chun houbung choum choum (local) ho thu aseiyin, "Khrista houbung hon salam napeuve" ati (Rom. 16:16). Aman pawl (denomination) ho ase ahipoi. Local houbugho ase ahi. Hichu Pakai Houbungho chu ahiuve.

Achoum'a seichen na din, Bible chang tamtah in ase Korenth kho'a Houbung, Ephesus'a Houbung, Philipi'a Houbung tiho hi nahet ding ahi. (1 Cor. 1:2; Eph. 1:1; Phil. 1:1). Mi kimkhat'a din hicheho hi het hahsa

himaithei ahi, ajeh chu amahon anahet' u Houbung chu pawl (denomination) anahi jeh ahi. Ahin nangin Pathien kam changa pawl (denomination) thu nasim doh masah louding ahi. Houbung umjouse Pakai houbung hicheh ding ahin, ama kiloikhom na cheh chu kisei ahin, abonchauva chu thakhat (kibang cheh) ahiuvin, hichu Houbung khat (universal church) a kitungdoh ahi. Pawlho suhmila aum'a Bible thuhila bou iche teng Pakaiyin eipehu Houbung chu hetbai lamtah ahiji tai.

Houbung a altha hetbai nadinga eikithopiu adang dangjong aum in, hiche ho chun Houbung hidan Bible lim hon eihet chensah uve.

1. **Khrista Tahsa** -Hiche hi Khrista Lhagao tahsa ahin, Khrista chu hiche tahsa luchang chu ahi. (Eph. 5:23). Tahsa khatseh bou aumin, (Eph. 4:4), hichu Houbung khatseh bou ahi Kol.1:18).

2. **Pathien insung mi** - Insung kiti kampao hi Bible in inkon khatin aseiyee, hichu Houbung hi Pathien insung mi, inkon (family) tin eihet chen sahuve. 1 Tim. 3:15 sunga Paulin Pathien inkon chu ahingjing Pathien Houbung atin ahi. Pathien chu Pa ahin, eiho achate ihuive (Gal. 3:26:27; Eph. 1:3).

3. **Pathien lenggam** - Lenggam hin Leng adoi ahin, hijeh chun Khrista chu leng ahi. (Thup. 17:14). Tun Leng aumtan, lenggam jong akitung dohtan, hichu tahsanin aum tai. (boldoh ahi tai) (Sol. 8:12). Eiho ama natoh chu

ihiuvin, vannoti hi alenggam ahin chule Thulhun thah hi adanbu (law) ahi. Hiche hi Houbung ahi. (Mat. 16:18,19).

4. Pakai Lengpi Lei- Pakai Jesu Khrista hi lengpi gui ahin, atahsan amichangcheh hi abah ahiuve. (John. 15:1-8). Hiche hin adoi chu lengpi leiya natos leh Pakaiya ga sodoh thu asehi ahi.

Hiti hin Houbung thu hi seichen in aum'e. Lungset tahin hiche thuho hi Bible changho vah in khoulchen inlang nangma dingin kimudoh teiyin. Pathien mapuiya kon Houbung chu nangma adia nakimudoh tengleh, nalunggel jouse kheelin lang, nahinkho jong kheelin.

Thudoh ho

Adihjo koul khumin:

- Ahinai Ahipoi 1. Bible in Houbung thu aseiyé.
- Ahinai Ahipoi 2. Houbung chu Catholic ahi.
- Ahinai Ahipoi 3. Mitam hon Houbung aheuve.
- Ahinai Ahipoi 4. Church hi Bible a thukhatseh in aseiyé.
- Ahinai Ahipoi 5. Khrista'n ama Houbungho asahdoh thei ahi, ati.
- Ahinai Ahipoi 6. Asia gam houbung sagi chu pawl sagi seina ahi.
- Ahinai Ahipoi 7. Houbung hi Khrista tahsa ahi.
- Ahinai Ahipoi 8. Tahsa khatbou ahi.
- Ahinai Ahipoi 9. Khrista Houbung Luchang ahi.

Ahinai Ahipoi 10. Lenggam ahung lhung polaiye.

Thudoh ho dihtah in donbut in:

1. Houbung hilouna ho phabep jihin,....
2. Houbung kiti Greek paova ipi ham?
3. Houbunga ipi pi pangem?
4. Houbung kijahdan thu (2) seiyin.
5. Ka Houbung kasahdoh ding ahi, tia kon aseijem?
6. Aman Houbung ija atundoh em?
7. Asia gam'a Houbung sagi ho ipi piham?
8. Tahsa ija um em?
9. Lengjouse Leng koi ham?
10. Pakai lengpi leiya ipi iboldiu ham?

Lahgomin seichen in:

1. Ekklesia
2. Khrista tahsa
3. Pathien insung
4. Pathien lenggam.....
5. Pakai lengpi lei

* * * * *

SIMMUN NI
HOUBUNG HUNG UMDOH
(THE COMING OF THE CHURCH)

Houbung hi jankhat sunkhat kah'a hungum doh ahipoi. Tohgoun, Thiemgao thusei Thutepho jouva bou hung kitungdoh ahi. Hiche houbung hung umdoh dan hi Bible in chentahin eivetsah uve.

Amasa tahin, Houbung hi Pathien lungsunga ana umsa ahi. Paulin Ephesus a mitheng te koma anasei na-a chun "I- Pakaiyu Jesu khrista Pa le Pathien vahchoiyin umhen; Aman eiho Lhagao phattheina tintangin Khrista'a vanho ah phatthei eichan ui; ajeh chu aman vannoi bul phudoh masanga pat ama ang'a ngailut nale thienga chule nolna beihel'a ium theina dinguva eiho eina lhandoh sau ahi; Jesu Krista vanga alamcha dinga eina sau ahi; hichu amalunggot le lungdei lambang dung juiya ama milungset loupiye chu vahchoi dinga angailut alunggot pa a lungset na chu manbeiya eiho chung a analhut ahitai." (Eph. 1:3-6).

Hiche Bible changa het ding chu Paulin Ephesus Houbung ho kom'a anasei na ah Pathien in amaho (Houbung sunga um Pathien chate ho) chu Houbung kiphu masang a ana lhandoh sa ahitai, ati. Asei nomchu Pathien in Houbung chung chang thu hi leiset ana sem masanga ana ngaito sa ahitai.

Hijehchun hiche phatlai'a pana chu ana ngaitosa (gountouh sa) ahijehin Houbung hi Pathien lungsunga hung kipan doh masa pen ahi. Semtil'a pan'a Pathien thil gounsa hi iti kidan hitam?

Anichan na in, Houbung chung chang hi thiemgao thuphoun ho thilsoh tamtaha kon in akihei, Isaiah in. "Ni nunungphat le hunghiti ding ahi, Pakai immun molsang chu molsang jouse sanga sangpen'a hung kitungdoh ding, thinglhang jouse vum'a hung kikhangdoh ding ahin; Hiche laiya chu namtin vaipi hunglhai khomcheh ding ahiuve. Hiche lechun chitin namtin hunguva hitia asej dihu, "hunguvin Pakai mol sanga kijottou vu hite, Jacob Pathien immun lam'a chun; Aman alampi aboncha eihil uva, chutengle eiho jong ama lamlah dunga ivale theina dinguin' ati diu ahi. Ajehchu Zion'a kon a danthu hungpot doh ding, Jerusalema kona Pakai thusei hung potdoh ding ahi." (Isaiah 2:2,3). Joel in "Khonung tengleh hitia hi hungum ding ahi. Keiman mihem tahsa'a hingho chung Kalhagao kabuh lhah ding ahin, nachateu pasal jouse leh numei jousen jong gaothu aseidoh uva, namiteu upa tehse hon jong mang aneidu, nagollhang jouseuvin jong thiemgao thilmu, banga thil amudiu ahi. Soh pasal ho le soh numeiho chung geiya, Hiche nikho laiya hi kalhagao kabuhliah ding ahi." (Joel. 2:28,29). Chuleh Daniel in jong hitin aseiyee." Hitabang lenggam

kihal jeng jung khanga lengho khangphat hileh van Pathienin lenggam khat ahin tundoh ding ahin, hiche lenggam chu kisumang kitlou hel ding ahitai, chujongleh aleng vaipoh thaneina jong namdang khat kidalhah pehlou ding ahi. Hiche lenggam hin, ajo'a ki sei lenggam dang jouse chu avohcheh soh keyia asuhbei hel ding, achang seha hiche lenggam vang chu atonsot geiya dingdet jing ding ahi." (Daniel 2:44). Tun thuchai na phabep ladoh (loidoh) uhite.

1. Lenggam chu nikho nunung lamleh tundoh'a um ding ahi.
2. Hichu molsangho chungu kitungdoh ding ahi.
3. Namtin jouse hiche'a chu kitoul lut (longlut) diu ahi.
4. Pakaiyin mihem jou chungu Alhagao alhakhum ding ahi.
5. Hichu lengli (4) channa (Roman empire) khanga kitungdoh ding ahi.
6. Hiche lenggam chun lenggam dangjouse anehmang'a atonsot'a dingdet jing ding ahi.

Tun, hiche ho jouse hoिया chamkim tam?
Solchah bung (2) simin.

Athum na - Houbung hi thutepsa ahi. Johan in "naicha" ahi, ati.(Mat. 3:2). Hichun sot louva kitungdoh ding ahitai, ati ahi. Khrista'n athutep na achun, "Nangma Peter na hi, hiche songpi chungu hi Ka Houbung kasahdoh ding ahi. Chule mithi kḥo kulkot pin anehjou louding ahi." (Mat. 16:18). "Tahbeha kaseipeh

nahiuve, hikom'a dingho kimkhat hi Pathien gam thuneitah'a ahung lhun amu kahseuva thina tepkha louding aum'uve" ati. (Mark. 9:1). "Chuin ajahuva," hitin akisun'e, Khrista chun gimle genthei athoh'a ani thum ni leh athilaha kona thoudoh kit ding; chule Jerusalem'a kipan chitin namtin jahjousea ama mina alungheiya chonset subbeina kihil lhang ding ahi. Hi chengse chu aboncha ahetuoh nangho nahiuve. Chule veuvin kapa thutep chu keiman nangho chungka kahin sol lhah dingahi; amavang chungka kon'a thahat nakivon masang seuin hiche khopi ahin umjingun ati." (Luke 24:46-49). Tun hiche thupi ho khoul'u hite.

1. Lenggam anai tai.
2. Khrista'n thina sunga hichu (Houbung chu) asahdoh dingin thutep aneiye.
3. Khrista to umkhom ho laha akimkhat Houbung kitundoh phat'a chu hing nalai diuvin aseiyé.
4. Hichu thanei tah'a hungding ahi.
5. Namtin laha kisihna le chonset ngaidam na thu Ama (Jesu) mina kihillhang ding ahi.
6. Hichu Jerusalem'a kipan ding ahi.
7. Solchah hon Jerusalem' khopi'a chungka kon thaneina anga diuvin aseiyé.

Lungsetta in, hiche thupi ho hi melchin in, achaina lama, Houbung hi tundohin aumtan, nangin jong hiche thu kipoundoh ho hi namudoh ding ahitai. Tun Solchah bung 2'a cheu hite. Phat tamtah lunglut taha nasim ding angaiye. Bible thiem (scholar) jousen

hiche nikho(phat) a hi Houbung kitungdoh in aphatsah chehuve. Chuti chun-amun Jerusalem, aphot nikho nunung lam, Roman gamvaipoh khang sung, chunga kon thaneina hungkum lha ta, Namtin jouse henga kisahna le chonset ngai dam na thu hillhangin aum tan, chule Houbung chu aiti in aum jing jiengtai. Hijehchun Pathien lungsunga um Houbung chu tundoh in aum tan, thiemgao thusei doh ho jouse jong achamkim soh in, thutep thudoul ho jong chintup in aum tai.

Thudoh Ho

Thudoh ho dihtah in donbut in:

1. Houbung hoiya kitungdoh masam?
2. Pathienin itih'a Houbung alhendoh em?
3. Lenggam hunglhun ding thusei thiemgao ho min 3 sunin.
4. Lenggam itihchan dingdet ding ham?
5. Houbung kitundoh ding koi athutep em?
6. Koi Houbung tundoh dinga Aman athutep em?
7. Katundoh ding ahi, tia vei izat aseiyem?
8. Lenggam chu ipito hung lhung ding ham?
9. Jerusalem'a ipi kihillhang ding ham?
10. Houbung kitundoh thu hoiya nasimdoh theyiem?

Adih, adihlou jihkoulkhum in:

Adih-Adihlou 1. Houbung hi tohgoun uma thiemgao thuphoun, thutep um, chujouva kitungdoh ahi.

- Adih - Adihlou 2. Houbung hi Pathien lungsunga
hungum pan ahi.
- Adih - Adihlou 3. Johnin lenggam anaitai ati.
- Adih - Adihlou 4. Lenggam chu thaneina toh hungding
ahi.
- Adih - Adihlou 5. Namtin'a chonset kisahna le ngaidam
na Ama min'a hillhanga um ding ahi.
- Adih - Adihlou 6. Houbung chu Jerusalem'a kipan ding
ahi.
- Adih - Adihlou 7. Solchah bung (2) in Houbung
kitundoh ding eisei peh uve.
- Adih - Adihlou 8. Hichu Roman lengte phatlai ahi.
- Adih - Adihlou 9. Phat nununghin ana kipan tai.
- Adih - Adihlou 10. Thiemgao thuphounho le thutepho
acham kim in chintup in aum tai.

Jih lhingin:

1. Aman ama dinga eina lhandoh u chu
..... masang ahi.
2. Hichua, hunglung ding ahi.
3. Pathien in lenggam atundoh ding ama chu imatih'a
.....
4.katundoh ding ahi.
5. Chonset kisahna le ngaidam na
hillhanga umding ahi.

* * * * *

SIMMUN THUM
HOUBUNG KITUN DOH
(THE ESTABLISHMENT OF THE CHURCH)

Simmun lui'ah Isaiah 2:2, 3; Joel 2:28, 29 leh Daniel 2:44 ho einakhoul chen un, Pakai lenggam Houbung chu ni nunning lam'a Jerusalem khopia Lhagao thieng ahung kumlhah ding, hichea chu namtin kitoul lut ding hichu atonsot'a dingdet ahi, ti chu eina muchen tauve. Chule Khrista amatah in Mat. 16:18; Mark 9:1; Luke 24:46-49 ah A Houbung atundoh ding thutep ananeyin, hichu thaneitah'a hungding chule amamin'a chonset kisina le ngaidamna namtin jouse laha hillhanga umding ahi. Tun Solchah bung 2 veleu hen, hiche bung 2 sungseh a kichen tahin thiengao thuphoun ho chamkim nale thutep (Pakai) chintup ahi imudoh tauve.

Solchah bung 2 isimleh Solchahho chuche phat-laiya Jerusalem khopia aum'u imutheyin ahi. "Chu in Penticost ni ahunglung tan ahile abonchauva munkhata umkhom ahiuvin: chuin phulou helouvin van'a kon in hui hattah nung gin bangin ahung gingin atounau in chu adimsoh jiengin ahi. Chuin meikong bangin lei ahung kilahin akikhan jalin aluchung cheh'uva achongin ahile, amaho Lhagao thieng adim settauvin, lhagaovin aseidoh sah bangun paochoum

paochoumin thu aseipan tauvin ahi. Hichea chu vannot leiset gamtin'a chitin namtin laha kon'a hougut Juda miho Jerusalem'a aumlayu ahi. Chuin chuche hugin chu akijah phat chun mipi ahung ki khomun, amitakipin ama amapao cheha thukisei ajah jehu chun alung kichilllah jiengun ahi." (Sol. 2:1-6)

Namchoum choumho jaona thusoh kimmelchih na aban'a eiseipeh'u veu hite. "Chuin abon chauchun kidang asauvin adatmo lleh jiengun, 'itina ahi dem' tin khatle khat akidongto tauvin ahi. Ahivangin adangho chun ajontaiyun, 'hiteho lengpiga tuithah kham ma huiua hi' atiuve. Ahin Peter somlekhat chutoh adingin aw sangtakin asamin ajahuva, "Juda gam mite le Jerusalem'a chengho nanghon nabon chauvin hiche hi heuvin, chule kathusei lung nachangin ngaiyun. I jehinem itile hiteho hi nangho ngaito banga lengpitui khama ahipouve; tu hi vai ahinalai bou ve! Pathienin ninunug nileh hiti ding ahi, mijouse chungka lhagao bunglha ding kahi; chule nachapateu na chanuteu vin lhagao thu aseidoh diu ahi. Chule nalhang val houvin mu aneiyuva, na upa houvin mang amat dinhgu; 21 chule hiti ding ahi, koi hijongle Pakai min'a tao chan chu kihuhhing ding ahi; ati" (Sol. 2:12-17,21)

Thilsoh ho jehchun thiemgao thuseidoh

masaho chu Peter in athuhil na'ah asolhadoh (aphoung doh) pai tai. Aman Jesu Pathien ahidan vetsah na chu amaho laha thil kidang anabol ho akonin Pathiena kon ahi ana tahlange. Chujou vin aman Khrista pehdoh'a auma migiloudan neilouho khuta thingpel'a khetbeh a aumle athau thu aseiphoungin ahi. Achainan, Pathien in akaithou vin thina kon thohgim na asuhmang peh tai tin, Peter in aseiyee. David thusei, Khrista ahung pengin, athin, lhanah akivuiyin, athoudoh kite, chujouvin vana akaltou vin, Apa jetlam'a atoutai, ti thu mipiho aseipeh chun, mipin athusei angainom lhehuve.

Aman hitin aseijom kitin, "Hiche Jesu chu Pathien in akaithou kit tan, aheto'h'a keiho kabonchau kahiuve. Hijehchun Pathien khut jetlamah choisangin aumin, athutep sa lhagaothieng chu Apa a konin amun, hichu ahin bunglhan, tua na mu-u najahu hi ahi. David chu vanah akalpoi, ahivangin ama tahin hiti hin aseiyee, "Pakai chun ka Pakai jaha kakhut jellama toujingin, keiman namelma ho nakeng chotpha kaneisah masang sen ati. Hijeh chun Israel insung mijou sen kichen tahin heuhen, hiche Jesu nanghon thingpel'a nakhetbeh'u chu Pathien in Pakai le Khrista'a atun ahitai," ati. Amahon thu hicheng chu ajah phatun alungu hema kisun abangun Peter le Solchah dangho

jaha, "Sopi te i-kati ding u ham? atiuve. Chuin Peter in ajahuva "Nalunghei yunlang chonset suhbei nan Jesu Khrista min'in nabonchau'vin baptize chang chehun, chule lhagao thieng kipe hi nachan ding ahi. Ijehinem itile thutep chu nangho dingle nachateu dinga chule gamla taha umho, Pakai i-Pathien un amahenga akouding ho jouse dinga ahi, ati. Chule thudang dang tamtah man ahettuohsah in, atilkhouvin, "tulai khanggilou va kon... hin kihuhdoh un, ati. Chu tah chun athujop chan chu baptize achang tauve; chule hiche nile lechun amaho mi sangthum jenin abetauve. 47 Pathien avahchoiyun, chule mijouse lungdeijin aum un ahi. Chuin Pakaiyin Huhhinga umho chu nisehin amaho a chun abejing tan ahi" (Sol. 2:32-41,47)

Tukal isimdoh diu Bible changho a'hi Pakaijin A Houbung atundoh ahitai. Hichu 'amun' Jerusalem khopi anahi. Solchah ho chungga lhagaothieng buhlhahin aumtai. Thiengao hon anasei na mun'a chu guilhungah ahi. Peter in adehin hichu anaphoung dohin, "ahin hiche hi Joel thiengao sei chu guilhunga ahibouve," (Sol. 2:16). Hijeh chun hiche thua hin imacha ginchat lalna beihel ahi. Chugouh hilouvin, Thiengao ho chun hiche thusoh ho hi ni nunungni leh hungsoh ding ahi, atiuva kipat, chule Peter in anasei Thiengao ho seitabanga hungsoh

doh ding ahi, ati a kipat, chujou chun Houbung chu ni nu nungnin tundohin ahung um tai. Namtin jouse hia chun apangk-homun chonset suhbei na dinga kisih ding thu hillhangin aum tai. Chuleh mi 3000 hon thu amangun, huhhingin aumun, Houbunga akibelap tauve. Hijeh chun Khrista'n AD. 33 in Jerusalem'a a Houbung atungdoh in, hichu atonsot'a dingdet jing ahitai.

Thudoh Ho

Koisei ham? Donbut in:

1. Ka Houbung kasahdoh ding ahi tia kon aseiyem?
2. "Pathienin ni nunungnile hiti ding ahi, mijouse chungga Ka lhagao bunglha ding kahi" tia kon aseiyem?
3. "Pakai chun Ka Pakaijaha kakhut jetlam'a toujingin" tia kon aseiyem?
4. "Kisihun chonset suhbei nadingin nabonchan Jesu minin baptize changun" tia kon aseiyem?
5. "Hiche khang gilouho a konin kihuhdohuvin" tia kon aseiyem?

Thiemgaoho thuseiya iti kisei yem?

1. Pakai lenggam itiha kitungdoh ding ahi atim?
2. Ipi khopi'a kitungdoh ding ham?

3. Hiche sunga chu mi izat kitoul lut'u vem?
4. Ipito hungtha em?
5. Itihchan kitung (ding sot) ding ham?

Thutepho seiyin:

1. Houbung kon asahdoh ding ham?
2. Ipi toh hungtha em?
3. Ipi kihillhang em?
4. Nam izat sunga kihillhang em?
5. Koi mina kihillhang em?

Solchah bung 2 sunga konin donbut in:

1. Lhagao thieng koi chang em?
2. Ama hung um ipia kiphoung (kilang) em?
3. Khrista Pathien chapa ahi tia mipi chu iti athunun em?
4. Mipi hon ipi adohuvem? Iti kiseipeh uvem?
5. Huhinga umho kon Houbunga abelap em?

Lungset tahin hichenin:

1. Houbung
2. Thiemgao thuphoun
3. Penticost ni
4. Kisih na
5. Tuilut (baptize) chan thu.

* * * * *

SIMMUN LI

HOUNG LIMSO DAN (IDENTITY OF THE CHURCH)

Phatsot tah nakikhenpi nagol ngaikhat nahetdoh nahetdoh theina dinga ipiti nalung a nasem em? Ama limsodan melchihna ho nasuhto khom'a chuten tg ama nahol pan hilou ham? Namudoh jouteng nangaito alimso chutoh akitouh'e tia naholpa chu nakhutsan theibep ahi. Chutabanga chu vannoiya Houbung tamtah aum'e. Adihpen chu hoiche ahi iti nahet em? Hoiche chu Khrista Houbung ahi tia iti nahet em? Houbung ahina lim so ho chu namelchih'a hiche houbung tamtah choum choumho chutoh nate tohle ding ahitai. Achaina leh Houbung toh kitouh amelchihna limso chu kichen tah'a namudoh teng hichu Houbung adihpen "khat" chu namudoh ahitai. Chuti ahileh amelchihna alimsodan ho chu ipi ham? Hoiya kimudoh theiyem? Bible ah hiche thudol ho akimuthei ye.

1. Houbung chu Khrista'n aphudoh ahi.

"Chule keiman nangma jaha kasei ahi, nang ma Peter nahi, chule hiche songpi chung a hi Ka Houbung kasahdoh ding ahi" (Mat.16:18)

2. Houbung chu Jerusalem'a kipan ding ahi.

Luke 24:45-49 leh Sol. 2:5 ah akimudoh theiye.

3. **Anikho kipatna chu AD. 33 hitei ding ahi.** Solchah bung 2 sunga Houbung ki tundoh na nikho chu Paenticost ni ahi, chentahin akihei.

4. **Houbung min chun Khrista min alah (aput) tei ding ahi.** Local Houbung choum choum umtei ding ahi. Paul in Rome mite kom'a (Houbungho koma) Khrista Houbung jousen salam nahin bolu ve" (Rom. 16:16) tia anajih imuve. Korinthia houbungho kom'a hitin anasei kit'e." Nangho khrista tipum nahiuvn, mikhat khat chu atibah khatcheh nahiuve" (1 Cor. 12:27). Achutile Tahsa (tipum) kiti ipi ham? Houbung ahi. (Eph. 1:22,23)

5. **Houbunga member ho. chu Khristian akiti.** "chule hiche Antioch a chu Seijui ho Christian asah masahpen u ahi." (Sol. 11:26). "Chuin Agrippa in Paul jah'a 'thu themcha-a jollhah a christian hisah ding neigoi ati" (Sol. 26:28). "Christian hi jeha hesoh genthei thohgim aum'a vangle amachun jachat nan neihhih hen, ahin hi che min chun Pathien choi-an jo hen" (1 Peter. 4:16). Achaina igeldoh diu chu "chule koima danga huhhingna aumpoi, ijeh inem itile vannotiya mihem laha huhhinga ium na diuva kipe'a mindang amindangin aumpoi, ati" (Sol. 4:12)

6. **Khrista bou Houbung luchang ahi.** "Ama chu tahsa (hichu Houbung) luchang ahi; ama chu abul ahin imalam jouse'a chungnung pen ahina dinga, athiho lah'a masapen ahi" (Kol. 1:18).

7. **Houbung khatsch bou aum'e.** "Tipum khat ahin chule lhagao khat ahi; hiche banga chu kinapna khat'a kikou nahiuve' (Eph. 4:4). Achutile tahsa (tipum) kiti chu ipiham? Hichu Houbung ahi (Kol. 1:18). Hijehchun tipum khat ahin, hichu Houbung ahi, chuleh Houbung khatsch bou aum'e.

8. **Houbung'a lutna ding danho:** Tahsan (Heb. 11:6), Kisih (Sol. 17:30), Tahsan phoundoh (Rom. 10:9,10), chule baptize cahn (tuilut) (Mark. 16:16). Mikhat huhhinga aumleh Houbunga kibe ahi, (Sol. 2:47). Rom. 6:3,4; Gal. 3:26,27; 1Cor. 12:13 baptize chan khat hi Khrista le a Houbung sunga kichang ahi tin eihiluve. Hiche thupheho ijuileh Houbung khat (ahilou leh) lenggam khata pengkhom cheh ihu ahi. (In. 3:3-5).

9. **Houbung Houdoul chun thil kidang aneiding ahi.** Christian ho hi hapt ni masa nia kikhomji ahiluve. (Sol. 20:7) La asauvin (Eph. 5:19), atao uvin (Sol.2:42), Bible ajaluvun (2 Tim. 2:15) Pakai jan-an ajongkhom uvin ahi (1 Cor. 16:2).

10. **Houbung tahsan pomdan (doctrine) hi Bible sehbou bulphu ding ahi.** Bible'a belap, lahдох ahilouleh kheel tiho umtheilou ding ahi. Bible seh hi Houbung tahsan (creed) hiding ahi. Belap lekha bu choum choumho le tahsan lekhabu kijin achoum dang chu pai (khutsan lou) ahi.

11. **Houbung kiloikhom na chu Pathien lunggoun to kitouh ding ahi.** Christa chu Houbung luchang (Eph. 5:23), local-khotin Houbung khatcheh chun Houbung upa (elder) le lhacha (deacon) aneidiu (1 Tim. 3; Titus. 1). Pakai houbung chun leiset lam lamkai (aluchang) leh munpi (headquarters) aneilou ding, nam dinmunle vannoti dinmun'a ki loikhom na len-mihem semthu umtheilou ding ahi.

12. **Houbung natoh (mission) hi tho 3 aumin ahi** Ama natoh chu kipana thupha sei phoung ding (Mark 16:15,16), Kithopi ngaichate kit hopi ding (Gal. 6; Jacob.2) chule Houbung mite tilkhou ding (Heb. 3:12-14) ahi.

13. **Khristian khatcheh tahsan umtah hinkho'a hingtei ding.** Vannoti ingailut lou diu ahi.(1 Jn. 2:15), (Jacob. 4:4), ahin lhagao ga sodoh (gadoh) tei ding ahi. Tahsan umtah hinkho chun hin-na lal-lukhuh asan ding (Thup. 2:10) ahi.

Hicheho hi Houbung melchih na phabep kiseidoh ahi. Aboncha, Bible changa kon kiladoh ahi. Tun na houbungleh tu'a kisei Houbung hi vetka (takah) in. Tekah nan thu masa 4 veuhite. Nangma kidongin, "Ka houbung hi koi tundoh ham? Khrista ha! mihem khat tou ham? Chule hoiche mun'a ka houbung hi hung kitungdoh pan ham? Jerusalem a hung kipandoh hei - munchom danga kon ham? Chule itiha chu keima houbung hung kipan doh ham? AD.33

joupeh ahileh Pakai Houbung hithei lou ding ahitai. Achai nan nangma kidong phan." Ka houbung hin koimin alah (akivon) ham? Christa min ahilouleh Christa'a hitheilou ding ahi. Tun hiche ho hin na houbung chu Pathien'a ha-mihem'a ham? ti nahetchen sah tan te. Lungthiengsel'a nang ma tahin Pakai Houbungleh mihem sem (tundoh) houbung akibah louye chu navetkahle nahetdoh jieng ding katahsan e.

Nangman Houbung dih khatseh Bible'in aseiya chu member khat nahi nakimudoh thei tan, Houbung dihlou nanuse'a, adih thu chu nahol'a thutah chu najuina din katemin ahi. Bible'a Pathien kamchang nasim'a namudoh banga chu Houbunga member khata napan dingin katem'e. Chujouteng nangman huhhing na namuna thutah khat seh sunga bou naum jing ding ahi.

Thudoh Ho

Dihtah in donbut in:

1. Phatsotpi nakikhenpi nagol ngai chu iti namudoh (na hisap) thei dem?
2. Tulaiya vannoiya pawl-houbung choum choum tamtah umem?
3. Adih khatpen chu iti nahet thei ding ham?
4. Limso dan melchihna ho hoiya kimuthei yem?
5. Houbung kon atun doh em?
6. Houbung kipatna hoi lai ham?

7. Itih'a kipandoh ham?
8. Houbung min jihin.
9. Tipum chu ipi ham?
10. Houbung memberho chu iti kikou vem?
11. Houbung luchang chu koi ham?
12. Houbung izat um em?
13. Houbunga lutna thei ding thupi ho seijin.
14. Houbungleh Khrista sunga iti kilut dingham?
15. Houdoul ho chu jihdohin.
16. Houbung tahsan thu (doctrine) ipiham?
17. Khotoul houbung tin'in ipi anei diu ham?
18. Houbung natoh thu 3 seiyin.
19. Khristian hikho mandan chu itabang hinkho ham?
20. Hinna lal-lukhuh kon asan ding ham?
21. Mihem tundoh chu Pakai Houbung hithei nan tem?
22. Jerusalem'a kipan lou houbung khat chu Pakai houbung hithei nantem?
23. AD. 33 a kipan lou houbung chu Pakai Houbung kiti thei natem?
24. Khrista min pulou houbung chu Pakai houbung kiti thei nantem?
25. Huhhinga umkhat nahile Pakaiyin ipi Houbunga naben tem?

* * * * *

SIMMUN NGA
HOUBUNG MIN
(NAME OF THE CHURCH)

Houbung chu Bible dungjui ahitah leh amin jong Bible dunjui hitei ding ahi. Iti tajongleh mihem semdoh houbungho mihem minle aloupinau toh kiseumtha tamtah aumin ahi. Hiche ho chu iti hungum doh ham? Akimkhat chu alamkaipau (atungdoh pa) min dopsang nan apeuvin, tekahin (Luteran), akehkhat in tahsan thuphoun doh nadin amin abolun, tekah in 'baptize' method' ti Pakai kin bol naho amin putsahun ahi. Adangin ma Penticost ni Sabbath niho anadom sangun hiche nikho min chun houbung min anabol uve. Achoum dang man kivaipoh khohsah nan upaho khutnoiya houbung natoh semdoh hu abul phu'vin 'Presbytereian' atiuve. Loupina le vahchoina pa-chatna chu Pakaiya ahin, amahon mihem thupi sahna chu akipat'a pan mihem apetauve.

Mihemsem houbungleh aloupinau adihlou dan ajeh phoundoh thei tampi aum'e.

Khatna'ah - Kikhen na asodoh'e. Amahon Pathienin khohtah'a anatao na John. 17 chu ana nieluvin Pakaiyin kipumkhat na ding atichu adonse tapouve.

Anina'ah - Amaho chu Bible changin themmo achan'un ahi. 1 Cor. 1:10-17 sungah mithieng Paul in asopi hon mihem min akivon'u khelna (bol khel)

ahi thu avetsah (aphoungdoh in) hichu kikhen theina choum choum (party ho) ahi, ana ti.

Athum na'ah - mihem minho chu Pakai min khel'a ana manchah'u ahi. Hiche thudol'ah "I jehinem itile vannoiya mihem lah'a huhhinga ium nadiuva kipea mindang amin dang in aumpoi, ati, (Sol. 4:12), tin ina simdoh uve.

Alina 'ah - mihem minle loupi na hin alamkai khelin, thu asuboi theiyin, atahsan louho lah'a muneo na asemдох'e. Amahon hicheho jehchun atahsan theipove.

Anga chan'na ah Amahon amaho minpu ho jouse chu amahojeh'a Khrista lam ahin jot'u ahi, tin amaho akichoï sangun, amangthah ahitauve. Hiche ho jeha hi amaho chu akhel-achonse ahitauve.

Houbung chung chang thu'a hin Khristan asahdoh din thutep apen ahi. (Mat. 16:18). Hichu athisan'a achoh ding tia aseina ahi. (Sol. 20:28), ama chu ahuhhingpu hiding ahi. (Eph. 5:23), chule aluchang hiding ahi. (Kol. 1:18). Adihtah le ama hina bangtah'a chu ama minpu (kivon) ho chun ama adopsang diu, aphutdohpa hiding, asadohpa hiding, ahuhhingpa le aluchang hiding ahi. Hijeh chun Paulin Rome a um Houbung kom'a lekha ana thot a chu ama gamkaiya um Houbunghon (khotoul Houbungho) salam apehu thu anaseiye. "Khrista Houbunghon salam nahin peuve" Rom. 16:16).

Chujouteng Korinthia Houbungho kom'a lekha anathot chun aman."tun nangho Khrista tipum nahiuvin mikhat khat chu atibah khatcheh nahiuve" (1 Kor.12:27). Hijehchun atil abula pan Houbung chu tipum (Eph. 1:22,23) ahijeh chun bailam taha seidoh ding chu Khrista Houbung ahi. Hichu Pathien Houbung (1 Cor. 1:2; Sol. 20:28), Pathien lenggam (1 Cor. 6:9), Khrista lenggam (Eph.5:5), A chapa ngailut lenggam (Kol. 1:13), i Pakaiyu lenggam (2 Peter. 1:11), Houbung (Sol. 13:1). Ahingjing Pathien Houbung (1 Tim. 3:15), A pengmasa Houbung (Heb. 12:23) tin jong akimu theiye.

Hijeh chun Houbung hi minkhat achoum beha peha kou thei (min choum vo thei) ahipoi. Tu'a igeldoh pai diu chu anei chu Pathien- Khrista ahin, akou dan bou kikhel ahi. Hi chehon (chunga ho) adoidan'u abon cha hi Houbung chu Khrista sahdoh bou ahi, ti hi ahipen'e. Khrista Houbung ahilouleh koi houbung hiding ham? Eiho Bible toh idin diu chule Houbung chu Bible in aminvo (akou) banga ikou diu ahi. Chujouteng le bou idih diu ahi.

Houbunga member-Houbung miho min chu Bible changhon chentah in aseiyeh. Isaiah thiemgao seiyyin panleu hen, Pathien in amite chu mithah apeh ding (Isa. 62:2) ahi, ati. Hichu Paulin kumsottah nungin ahin mangin ahi (Sol. 9:15). ahin chidang namdang hon Pakai thu angai masanguvin hiche

min chu akipe pouve. Hichu Syria gam Antoich kho'a seijuiho hung kiminvo masatpen'a chu hung lolhing bep ahi. (Sol. 11:26). Khonung in Paulin Agrippa lengpa thu anahil na-a chun isimdoh auvin, aman adonbut na ah "chu in Agripa'n Paul jaha 'thu themcha'a jol lhaha Christian hisah ding neigo'i ati" (Sol. 26:28) tin imuve. Achaina a Peterin a nasei na a chun, "Khristian hijeha hesoh genthei thohgim aumvangle amachun jachat nan neihih hen, ahin hiche minchun Pathien choi-an jo hen." (Pet. 4:16).

Hi jehchun Thulhun thah khanglaiya Christa nungjuiho chu Christian ana kitiu vin "Christian bou" ahiuve. Tu khangin jong Pakaiyin eiho chutabang ding chun eidei uve. Eihon Khristian min chu achoum danga ikheluva, ikiminvo uleh Khristian dihtah ihilou'u ahi. Khristian loupi na chu vannoi munchoum danga umho toh kibang cheh dinga Pakai deidan ahi.

Houbung minle Houbung member ho hin Khrista min adopsangu ahi. Ipijeh inem? Hichu inkoun (family) min ahi. (Eph. 3:14,15), min jouse chung'a hi ding (Phi. 2:9-11), Huhginga um na min hiding (Sol. 4:12) ahi. Hiche jeha chu eihon Jesu mina itahsan uva (1 Jn. 5:13), hiche min chu iphoundoh uva (2 Tim. 2:19), hiche mina chu ikisih uva baptize ichanuva (Sol. 2:38), hiche min sunga

chu ikikhopuva ama ihou khom uva (Mat. 19:20),
ama mina chu iyakai iboluva (Kol. 3:17) hitia chu
ama mina tonsot hinkem louinei thei nadiu ahi.
(John 20:30,31).

Tun ilung sunguva kichentah'a min ikou ding
chu mindang aumpoi, ti hi ahi. Mihem minle
aloupina achun huhhing na aumpoi ti, kichentahin
isei ngam tauvin mi hem mina kiminvo ho chu
hicheho jeha chu mangthah diu ahi. Hiche jeh chun
Khrista min seh seha bou huhhingna aume, tin kichen
tahin ihetauve.

Thudoh Ho.

Hiche hohi sun lhigin:

1. Houbung chu Bible chang sei banga
2. Mihem sem minle loupi na chu
3. Taona hi Thu'mna
4. Tun nangho chu
5. Pathien in amite apeh ding chu

Adih jo koulkhum in :

Adih'e Adihpoi 1. Houbungin Bible dungjuiya min
aneiyem?

Adih'e Adihpoi 2. Mihem sem Houbung minle aloupina
chu kheel em?

Adih'e Adihpoi 3. Khrista min'a huhhing na um em?

Adih'e Adihpoi 4. Pakaiyin min kibang putcheh, tulaiya,
adei yem?

Adih'e Adihpoi 5. Ama min kivon louva mikhatin Pakai
loupina apehthei yem?

Dih'tah in donbut in :

1. Mihemsem Houbung minho chu iti hung kon doh em?
2. Mihem sem minho adihlou dan ajehho simin
(sunin)...
3. Khrista ipidinga taovem?
4. Paulin asopiho pawlchoum choum'a akikhen
thanguva chu ipi abol em?
5. Houbung in ipidia Khrista min akivon dia lom
ham?
6. Rom. 16:16 Jihin.
7. 1 Kor. 12:27 sunga Khrista tipum chu ipi ahi, atim?
8. Houbung mindangho seiyin.
9. Houbung chu Khrista Houbung ahitah hihleh koi
houbung hitan tem?
10. Houbung member ho chu ipia kikou'u vem?
11. Khristian min thum'a kikouna chu jihin.
12. Tukhanga (tua) Pakaiyin ipitoh i'umpiu vem?
13. Khristian kichientah ihi nadiu hithei yem?
14. Ipijeha eihon Khrista min ichoisang diu ham?
15. Khrista min'a eihon ipi iboldiu ham?

* * * * *

SIMMUN NGUP
HOUBUNG KILOIKHOM NA
(ORGANIZATION OF THE CHURCH)

Khrista'n Houbung anatumg doh in (Mat. 16:18) ahi. Houbung chu vannoiya kon'a kikou doh ho'a kon kisadoh ahi (Kol. 1:13,14). Hiche a chun huhhinga umho apanguve. Hichu Pakai lhagao tipum ahin, (Kol. 1:18) khatseh bou ahi. (Eph. 4:4)

Ama hidan tah'a Houbung chu vannoi losoh ahin asang som asangja 'a khotoul houbung (local churches) ho akon ahi. Khotoul houbung khat chu member tamtah'a kon ahi, hichun khotoul houbung khat amale amacheh kivaipoh diu, gampumpi hom, ahilouleh, vannoi pumpi hom'a kivaipoh na umlou ahi. Chule Pakai Houbungin vannoi lamdol'a lamkai-lu changleh kivaipohna munpi (headquarters) aneipoi ti hi ahi. Bible changhon eihil nau va Khrista chu Houbung luchang ahi, ati. Noiya Bible changho hi veuhite- "Chule aman thiljouse ama thunoiya, Akengto noiya akoisoh ahi, chule Houbung dia thiljouse luchang hina apeh ahi. Hichu ama tahsa ahia, ama dimset banga iyakaiya iyakai adimsah ahi, hi chu aheta dinguva taoji ahi" (Eph. 1:22,23). "ajeh iham itile Khrista houbung luchang ahibanga chu inneipu jong numei luchang ahi: ama tahsa huhhinga jong ahi." (Eph. 5:23). "Ama chu tahsa (hichu Houbung) luchang ahi, ama chu abul ahin imalamjousea chung nung pen ahina dinga athiho lah'a masapen ahi."

(Kol. 1:18). Tun, hiche Bible changho hin ipi eihil u'vem? Khrista chu Houbung (tipum) luchang ahi tin aphoung dohe. Luchang izat um em? Khatseh bou ahi, hichu Khrista ahi, midangtoh hom thei dinmun ahi poi.

Houbung chu khotoul Houbung tamtaha kon kisadoh ahi'a, Houbung kitundoh til'a pan Khrista chu aluchang ahileh, hichun khotoul Houbung tin luchang ahi tina ahin, chubang chun Houbung member jouse luchang cheh jong ahitan ahi. Paulin hitin anasei ye, "Ahivangin Khrista chu Pasal jouse luchang ahia, pasal changse numei luchang ahi a, chule Khrista luchang Pathien ahi chu heleuchun kalung ahi." (1 Kor. 11:3).

Aban'in khotoul houbung tin in amaho cheh kiloikhomna sunga kivaipoh na aneiu ahi. Houbung memberho laha chu Khrista chu aluchanga panga upaho (elders) le lhacha ho (deacons) chu tahsa le lhagao lam'a avatnau vetup dinga kipansah ahive. Upaho(elders) chu Houbung member ho lhagao lam vetup ding ahivin (Heb. 13:17), Lha cha ho (elders) chu Houbung member ho lhagao lam vetup ding ahivin (Heb. 13:17), Lha cha ho (deacons) chu tahsa lam thil ngaichatho suhtup peh ding kin kipe ahive (Sol. 6). Hetding phatah chu, Houbung miho chuga kinnei upaho, lhacha ho hi Bible changhon ase na'ah atam (plurality) ajangin, hijehchun local khat'a Upa khat, lha cha khat in avaipoh din akisei poi. Upaho le

lhacha ho hi Houbung mipiho chung a thunei ding (control) ding ahipovin, Houbung hi khatle khat kiloikhom na ahin, mikhat in khat chung a thuneitah'a na atoh nading mun ahipoi.

Elder, Pastor, Bishop, Shepherd chule Presbyter kitih o hi a'altha thakhat, athanei nau khakhat cheh ahibouve. Hitia chu upa (elder) chu pastor, bishop ahi. Titus 1:5-9 sungah Paul in amaho hinading aseina ah, "5. thil kibol bulhing lou chengse chu nabol tupsoh keyia chule khopi tinchenga upaho napan sahding, hiche ding a chu Crete a ka dalhah nahi. 6. michu koi hileh nolna bei, numei khatseh jia neiya, chule achate chu Pathein tahsan hia, chonchat vaina lamle thunun louna lam'a seiset changlou hiding ahi. 7. ajehchu iham itile houbung lamkai chu Pathien gou ching nga ahijeha chu nolna bei hiding dol ahi; kicham sah, lungsabei, ju'a lop, midenga, alamlou va phet choum nading ngaito'a kilose mi hilouva, jindot thiem, phat ngailu'a lunglimgeh, chon dih, athieng, amachang kitim thiem mi bou hiding ahi; chule thuhil pha kicheh a chu mi thuhil-a thiem'a, mi nielkal'a hatte ho athiemmo nau alansan thei nading a thu kihil dungjuiya ginchat umtah thu chu kolchah mi bou hiding ahi." Ahina ding dol chu 1Tim. 3: 1-7 sunga jong akisun'e. Hijehchun mi tapou chu Upa (elder) hitheilou ahi. Upaho chu hitabang lhagao mi hina neiho bou chu lhendoh hidiu ahi. Local Houbung tina upa thei aum masanga Houbung sunga pasal hon Houbung chung chang natoh vaihom na ho chu,

Houbung ahung khantou va upa thei miho ahung umtokah sea kin alahdiu ahi.

Lhacha (deacon) ho hi upaho toh tongkhom (kithopi) ding a kipansah ahiuve. Amaho chu upa ho natoh na sunga manchah le ding ahiu ve. Asol solnauva pangding tia hetthei ahi. Paulin anaseina ah "chutabang ma chu Houbung lhacha'a pangding jong chu migun ja umtah bou hiding ahi; mi kamtam hilou ding, alamlouva sum veikan lunggo mi hilou ding, 9. chule ase apha hetouh'a ginchatna thuguh tuhmi bou hiding ahi. 10. Amaho chu kipatep masa hen, chujoule nolna bei ahiule bou lhacha na tong u hen. 11. chutabang ma chu numeiho jong, migun ja umtah mihehset hatlou kitim thiem chule iyakaiya tahsan neitah hiding ahi. 12. lhacha ho chu numei khatseh ji (pasal) hicheh hen, achate chengu le a-insungu phatecha potup thiemcheh hiu hen. 13. Ajehchu Houbung lhacha na phatecha tongho chun amaho dinga dinna phale Khrista Jesu ginchat na'a chu ha katcheh na aneijiu ve" (1 Tim. 3:8-13).

Tun Houbung kivaipoh na (kilo khom na) hi Pathiena kon hung ahi, ti ihe tauve. Khrista chu Houbung luchang ahin, local khat cheh chun amaho cieha ding upa le lhacha aneicheh uve. Amaho thuneina (vaihom na) noiya chun Pathien thuseiho, Oja ho (mihil ho) le member ho aum uve. Pakai dan (lampi) dungjui chun local khat suh khelna anei khah leh local dang khatin tahsan umtah hina'a amasot pihdiu ahi. (adin detsah diu ahi). Lo-

cal pumpi tahsan na'a (thutah a) apotdoh uva mikhat tabang thutah'a aumkhah leh amajeha chu tahsan umtah hung hithei ahi. Pakaiyin Houbung dia agoun chu ahileh Local khat cheh hi jalen taha (cham lhat tah a) amaho le amaho thu nei taha kivaipoh diu ahi. Amaho chu mihem sem dan a kikan lou diu, Ngailut na joha kivaihom diu ahi. Amaho chu Khrista sunga kilokihom diu, na atoh khom diu, chule Khrista sunga khata umkhom diu ahi. Pakai lampikalin khantou na akibol theipoi.

Bible chang hoima cha'ah Peter ahilouleh mihem dangkhat Houbung luchangin apange ti nasimdoh lou ding ahi. Hoiche muncha ajong bishop khat, pastor khat in Houbung luchang hina, houbung jouse chungu thu aneina, vai a'omna nasim dohnamudoh lou ding ahi. Bible hoiche mun cha ajong Christian kulu(clergy) le milham(laity) ti kijih namu lou ding ahi. Hou atamjo ho hi Pathien sem kiloikhom na Houbunga kon in akikhandoh un (apotdohun) hichu vannoiya hataha kikhen thangna avetsah na khat ahi. Hi jehchun tun eiho Bible a kinungleu hitin, Bible in aseu Houbung dihtah kivaipoh na achun umtau hite.

Thudoh Ho

1. Houbung Koi tundoh ham?
2. Houbung koiho a kon kisemdoh ham?
3. Khrista tipum chu tahsa a ding hei, Lhagao a ding ham?
4. Houbung izat um em?
5. Houbung chu ama hidol tah a ahi.
6. Houbung chu asangsom asangja a kon ahi.
7. Houbung kivaipoh na chu gam pumpi, ahilouleh vannoi pumpi ham?
8. Pakai Houbung chun Leiset lam luchang le leiset lam munpi (headquarters) aneyem?
9. Koi chu Houbunjg luchang ham?
10. Khotoul Houbung tin lamkai ho chu iti kikou vem?
11. Upa ho (elders) le Lhacha ho (deacons) natcho chu ipipi ham?
12. Local khat cheh in Upa (elder) le lhacha (deacon) izat cheh anei diu ham?
13. Upa ho (elders) chu mindanga iti kikou theyem?
14. Upaho hina (qualifications) Bible hoilaiya um em?
15. Lhacha ho hina (qualifications) hoilai bible changa um em?
16. Upa le Lhacha tena lhinglou Houbung khat chun Upale Lhacha aneithe yem?
17. Hiche thua hi kon alamkai ding hitam?

18. Local Houbungho iti umkhom diu ham?
19. Pathien goun kalvala khantou nading kibol theiyem?
20. Bible dungjuiya Peter chu Houbung luchang hithei yem?
21. Houbung sunga natongho jouse chungu bishop kiti chun vai apoh dia isimdoh uvem?
22. Pastor chu Houbung chungu um a isimdoh uvem?
23. Bible sunga Pathien mideh (clergy) le milham ti isimdoh uvem?
24. Vannoiya hataha kikhenna iti umdoh ham?
25. Houbung kivaipoh dih mudoh nathei dia hoiya iche diu ham?

* * * * *

SIMMUN SAGI
HOUBUNG A LUT NA
(ENTERING THE CHURCH)

Eihon tuchan gei ihin khoul nau sunguva Houbung athupiye imudoh tauvin ahi. Hiche hin (bible chang hon) Khrista Houbung dinga ahung thi eihilun ahi (Eph. 5:25). Chule hichu (houbung chu) athisan'a achohdoh ahi (Sol. 20:26), Houbung huhhingpu jong ahi. (Eph. 5:23). Thudoh ho ahung um tan; koi tabang ham khat dingin khrista hung thileh hichu thupi mon tam? Houbung khat dingin athisan hunglha leh kilom mon tam? Ama chu huhhing pu ahileh hiche (houbung) polam a huhhing naumtheijin tem? Nangin hiche ho hi khatcha nakhutsan lou ding ahi, hichu adih ahi. Achutileh Houbung athupi poi, Houbng member sung hihih jong le huhhingna aum theiye, tia iti kisei thei ding ham? Hitabanga seiho chun Houbung ahetchen lou u ahin, hiche nadinga chu lheplhaha umkha ji ahive.

Kichen tahin Houbung chu huhhingpu ahi tin, Biblei in ahilpoi, ahin Houbung sunga um chu huhhinga umtei dingin eihil uve. Kong chu huhhing pu ahiponan, Noah le a in sungmite chu tuisanglet a kon huhdoha aum nadiuvin kongsunga ana um aun, hi banga chu Houbung chu ahi. Houbung a chun Pakaiyin huhhinga um mikhat chu abelap jin ahi. Penticost nia kipana thupha sanga huhhinga umho, chule chujou nikho hoa Pathien thu jopho chun Pathien avah

choijun, chule mijouse lungdeijin aum un ahi. Chuin Pakaiyin huhhinga umho chu niseh in amahoa chun abejing tan ahi." (Sol. 2:47). Hijehchun mikhat huhhinga aumleh Pakai Houbunga member a hung hiji ahitai. Member ahung hilou leh huhhinga umlou ahi. Hetbei tah ahi. Lamchoum'a, hetbei taha seidia chu, Houbung polam ah huhhingna aum poi, tihi ahi. Pawl houbung choum chouma member hilou vin koitabang ham khat huhhingin aum theijin, ahin khrista Houbunga member hilouvin koiman huhhing na amuthei poi.

Banjamin khoul leuhen, mikhatin Pakai Houbung ajop thei poi, Pakaiyin abelap tilouvin. Huhhing na chang ho bou chu aman abelapin, Houbung chu huhhing a umho a kon kisadoh ahibou ve. Pakaiyin mihemlungchangle lunggel (lungdoi ho) bou aven ahi, hichun mikhat lungthieng sela anatoh chu asodoh sah thei ahi. Ama chu Pathien in a Houbunga aben, milungdih lou ahileh eihon (mihem in khutsan jongleh) Pathien in a Houbunga abe ngai poi, ajeh chu ama thunun na sunga umte ho chondan aput lou jeh chun eiho mihem lungsunga ipium imu loujehun achon na (apolama muthei) ivetu angaiye. Mikhat in Houbung ajop nom leh alungput jouse chu santheiya akhel ding angaiye. Hichu Pakai amatah Palai (kinla) ahijeh chu ahi. Pakaiyin amalam'a (lamkhat seha) ichediu adeiyin, koitabang khat ache khel ding (huhhing changsa) adei poi.

Khrista Houbung huhhingpu ahia kipan huhhing changsa ho bou Houbungah aben, amaho chu lungthieng sel'a Pakai ngaichat henomho chu ahuiue. Amaho chu Houbung sunga lamdiha lutnom ho chu ahuiue. Hiche ho chu Pathien kamchangin chientah in a phoungdohe. Adehin solchah ho thilbol na sunga lamchoum chouma kikhelho thu-in hetchen thei ahi, ahin Pakai Houbunga lutna dinga kelbi, ahi louleh, akimanachah dan (specific terms) ho chu noiya bang ahi.

1. Thutah thu ajah tei ding "Chuti ahijeh chun thujaha Kon tahsanahin, chule thu chu Khrista thuhila kona hungum ahi" (Rom. 10:17).

2. Pathien le Khrista chu atahsan tei ding "Nalungu donsah hihun, Pathien tahsan un, chule keima jong neitahsan un" (Jn. 14:1).

3. Achonseta kon kisih tei ding "Ahipoi, kaseipeh nahuiue, nangho jong lung nahei lou'u leh chutabang ma chu naman thah dingu ahi, ati (Luke. 13:3).

4. Khrista chu Pathien chapa ahi tia aphoundoh tei ding ahi. Christa ama tahin aseiyeh "Hijehchun koi hijong le miho anga keima eiseidoh chan chu keiman jong vana kapa anga kaseidoh ding ahi" (Mat. 10:32).

5. Chonset suhbei nadinga Baptize changtei ding ahi. Hiche hi tuilah a kivui ahi, (Rom. 3:3,4; Sol. 8:26-39). "Atahsan a baptize chang chu sohcha ding ahi, atahsan lou vang chu thiemmo changa um ding

ahi" (Mark 16:16). "Chuin Peter in ajahuva nalunghei jun lang chonset suhbei nan Jesu Khrista minin nabon chauvin baptize chang chehun, chule lhagao thieng kipea chu nachan ding ahi" (Sol. 2:38).

Tun, simmun kipat na lama chu ipi inikihil uvem? Pakaiyin, huhhingau mho chu Houbunga abei, ti ina mudoh tauvin ahi. Hiche hin mikhat Pathien thua anun leh huhhing a aume, chule ama chu Houbunga belap a umjieng ahi, tina ahi. Tun eihon imu'u chu mikhat in thutah thu ajaha, atahsan a chonsetho a kon akisiha, Khrista aphoun doha baptize achan leh huhhinga um ahitai. Hitia chu mikhat Houbunga belapa hungum a, eiho atahsan jouse jong Pathien thu ingai uva kipata' Pathien tohgoun chu huhhinga i um diu, chujouteng Pakaiyin a Houbunga i belap pai diu chu ahi.

Lamchoumkhata Pakaiyin aseina achun Pakai lenggam a lutna ding lamkhat bou aum in, hichu tui le lhagaova pena kon bou hithei ahi, ti chu ahi (John. 3:3-5). Achutileh Pathien lenggamchu ipi hitam? Hichu Houbung ahi (Mat. 16:18,19). Houbunga lutna dinga Pakaijin lam 2 aneyem? Ahinai sai poi. Hijehchun mikhat in Pathien atahsan a baptize achan jouteng (Pathien thu kihil na kon Pathien thunun na sunga Lhagao thieng kipe achan jou teng) Pathien lenggam a dinga peng ahitan, Pathien insung mia peng ahitan, hichu Pakai Houbung chu ahi.

Chukitleh Paulin anaseina ah eiho tipumkhat sunga baptize chang ihiuve, ati (1 Kor. 12:13). ahileh tipum kiti chu ipi hitam? Hichu Houbung ahi (Kol. 1:18) Houbung izat um em? Khatseh bou ahi (Eph. 4:4),(Eph. 1:22,23). Hichu Korinthia Houbung hon anabol u chu ahi (Sol. 18:8). Hijehchun mikhat Houbung sunga baptize achan le hiche Houbung tibah khat ahung hin hiche sunga chun belapin aum tai.

Eihon imudoh banguvinhuhhing nadingin (sochat nading in) lamkhat seh bou aumin, ama chu Pakaiyin Houbunga abelapjin ahi. Nangman hiche thu Bible a nasim jouva Houbunga member khata napan thei hitam? Napan theilou leh huhhinga umlou lai nahi. Khoulchen in, chule Pakai thun nungin, chutileh ama tahin a houbung a nabe sah ding (nabelapding) ahi.

Thudoh Ho

Dih tahin donbut in:

1. Houbung thu ikihil nau sunga ipi imudoh uvem? .
2. Houbung dia koi hung thiim?
3. Houbung dia ipi hungkipe doh em?
4. Houbung huhhingpu chu koi ham?
5. Houbung athupi dan iti ihet thei uvem?
6. Ipijeha kimkhat in Houbung athupi poi atiu ham?
7. Houbung in ahuhhing thei yem?
8. Houbung member hina dinga Huhhing chan ding ngaiyem?

9. Tuisang leta Noah insungmi huhhinga aum nadiuva
thupeh hoiya amu vem?
10. Kong polama huhhing na um theiyem?
11. Huhhinga umho kon Houbung sunga abelap em?
12. Hiche thudol kihil na Bible chang seiyin.
13. Mikhat huhhinga aumleh ipi Houbung sunga
member hijieng hi tam?
14. Mikhat touvin Pakai Houbung ajop theijem?
15. Houbung sunga lutna thei ding kalbi 5 ho chu ipi
pi ham?
16. Hiche thupeh ho manglouva mikhat chu huhhinga
um theijem?
17. Tuilut (baptism) kiti ipi ham?
18. Tuilut adoitup ipipen ham?
19. Pathien lenggam kiti ipi ham?
20. Lenggam lutna dinga lamkhat seh chu ipi ham?
21. Tipum kiti ipi ham?
22. Tipum izat um thei jem?
23. Tipum sunga iti lut thei ham?
24. Huhhinga umna dinga lam izat um em?
25. Houbung sunga lut nathei dinga lampi izat umem?

* * * * *

SIMMUN GIET
HOUBUNG HOUDOUL
(WORSHIP OF THE CHURCH)

Houbung hi huhhing changsa hoa kon kisadoh ahi. Houbung doitup chu Pathien hou le akin bol ahin, hichu Jesu Khrista akon hiding ahi. Paulin "Chule thulam ahin, natoh lam ahin nabol chan'u Jesu Khrista min in bolun; chule ama vangin Pa-Pathien thangvah jingin um un" (Kol. 3:17).

Thulhunthah sunga Pathien houdoul zat 3 in akimun ahi.

Khatna'ah : Ngol hoi Pathien houna isimdoh uve. Paul Athen khoa molchung ho'a lim semthu ho tamtah ana mun, ana hetouh in, hitin anasei ye, "Ijehinem itile 'hetphahlou Pathien ding'tia kisun maichamkhat kamui, Hijeha chu nanghon hetlouva nahoujiu chu keiman nangho kaseipeh nahiue" (Sol. 17:23). Tulaijin jong chutabang ngol hoi taha pathien houho aum nalaiye. Mi sang tamtah lim semthu anga abohkhup gouh'u hilou vin, ngolhoi Bible a kon houchoum choum ho chondan juina a kigenthei bolho jong asang som asang jan aum nalaiye.

Anina'ah : Pakai kamchangtah a panna beiya Pathien houho thu aseiy. Khrista'n "Ama hon athuhil

nauva mihemthupéh jieng thu'a ahil jehuvín, i hou'u jong moh ahi, ati" (Mat. 15:19). Tulaiya mi atamjon hitabang hin Pathien ahou uve. Ataha chu amahon Pathien ahou'u ahinai, ahin hichu panna bei ahitai. Ajehchu amahon Pathien thu toh kitouha housangin mihem chondan ngaiya mihemho dan sem ngaina houdoula Pathien ahou jehu ahi.

Athum na'ah : Pathien kamsoh in aseí houdoulchu adih ahin, hichu thutah le lhagao va hou ahi. Khrista kamsoh isim dohu chu "Pathien chu Lhagao ahi, ahou ten ama chu Thutah le Lhagaova ahou dingu ahi ati(Jn. 4:24)." Pathien san thei houdoul chu hitabang bou chu ahi. Hichu Pakai Jesu Khrista khanglai jong, tu eiho khangá jong adih ahi. Lhagaova jangkeiya kinemsah tah'a Pathien hou hi thutah ahi. Pathien in koima tanti taha (thunei taha) ahou din anopoi, ahin ama deidan lampia ahou dingu adeiyin ahi.

1.Pahtien thu jil dingin akikhom jiuvin ahi. Timothy jong aneo laiya pan in Pathien thu Bible ana kihilin ahi. (2 Tim. 3:15).Paul in khang dong Pathien- thusei hinan ana tilkhovín ahi. "Nangma ki patep thiem chang banga Pathiena kipeh nadingin gun chun, ponpan in, jachatna beihel natong mi hin, thutah thu chu jangkei chan mangchan "(2 Tim. 2:15).

Hiche hin Khristian jouse akikhop tengu adeha aboldiu aseiyé. Pathien in achate athu'a akihoulim pi phatchu hiche phat hi ahi. Sol. 20:7 ' ah Paul in sopiho chu Bible jila konin Pathien thu aseipeh'e, ti isimdoh uve.

2. Atao jiuvin ahi. Mipiten pentecost nia Pathien thua anun'u nung chun hitin isim dohuve" Chuin amoho chu solchah ho thuhila jong, kithokhom in jong, chang lhah semkeh in jong, taovin jong gunchu tahin apangdet jing tauve." (Sol. 2:42). Taona akon Pakai mite ho chu van'a um a Pau Pathien toh kihou matna anga theiun ahi. Khristian khat Pathien houna a midangkhat to akiloi khoma taona aman tei ding ahi.

3. Pathien vahchoila asaue: Paulin asopiho koma anasut na'ah, "Pslam lan, houlan chule lhagao lan kihoulim un, nalunggil un Pakai dingin kituoh delin longdel in la asuvin" (Eph. 5:19). Kol. 3:16 leh Heb.13:15 jong simin. Aw ginga lasah dan (music) zat 2 aum'e. Khat chu kama lasah ahin, adang khat chu machine (khoul) a sah ahi. Pathien dei hoiche joh chu ham? Pathien in angaichat chu kama vahchoi lasah chu ahi. Paulin ase chu eihon ilungthimu vin longdel in Pakai vahchoi ute, ati ahi. Hiche hin machinea lasah chu ajaosah lou (adalah) ahi. Khristian msa hon hiti chun vahchoi la asau vin Pathien athangvah uve. Khum

zabi tamtah jou nungin machine a lasah ahin belapuvin ahin Pathien in Phatthei aboh pon (not ordained) khut jong akhut sanpoi. Khristian hon machine in Pathien avahchoi thei pouvin, hitichun taona jong amang thei pouve.

4. Amaho Pakai jan-an jong dingin akikhom jiuve. Eihon Sol. 20:7 sungah hiche chu vetkah in imudoh theiuve. Mat. 26:26-28 leh 1 Kor. 11 sunga changlhah chu Khrista tahsa geldoh nading leh khona lengpiga tui chu Khrista thisan geldoh jing nading ahi. Hiche jeha chu tunigeiya eihon ibol jomjingu ahi.

5. Asum'u asepkhom jiuve. Paul in Galatia le Korinthia sopi ho thupéh ananeijin, "Keima kahung tenga tolom sumkidon lou nadingin, hapta ni masanileh atojou kham chehin dongun ana kikhoh un" (1Kor. 16:2; 2 Kor. 9:7) jong simin.

Hiche ho hi Khristian masa ho hapta ni masa nia Pathien hou dinga akimuto nau (akikhop nau) thu ahi, (Sol. 20:17; 1Kor. 16:2). Amaho thujahsah anachangun "abang khat tou chon na bangin ikikhop hailouvin, nikho chu ahung nai tul tul'e, ti ihetchan un khat le khat kitilkhoh to chehjiu hite" (Heb. 10:25). Tulai khristian ho jong hiche nikho a hi hitabang chon dan ho chule hitabang kihilna (kikhop na) ho a ipan diu ahi. Houbung houdoul hi bailam tah ahin, chutabang

bailam tah sungajong bolkel aum nalaiye. Ama hon puchon pachon ngaina, taona kilhang lhah ti ho lehhoudoul ngaina tiho jaosah din alom'e, tin angaito jiuvin ahi. Hichu ahithe i poi. Pathien in houdoul thu ana phoungdoh tan, aneo penin mihem maicham sem (achom beha bol theina) na jong ape poi. Iti bolding ahi ti kalval in belap ding, lahdoh ding jong phal ahi poi, hitabanga bol a chu Pathien sapset chang ding ahi. Pathien in ase i chu mihem hon angai ding ahi. Chujouteng Pathien kihou thei, kiva hchoi thei a chuleh amin dopsanga umding ahi.

Thudoh Ho

Dih tahin donbut in:

1. Houbung chu ipia kisadoh ham?
2. Houbung doile tup ipi ham?
3. Pakai mina ipi kibol ding ham?
4. Thulhun thah sunga houdoul izat um em?
5. Paulin hoiche muna milim -doi tamtah amudoh em?
6. Amaho houdoul thu ipi ase i yem?
7. Tulai mihon jong hitabanga chu houdoul abol u vem?
8. Panna bei houdoul thukonase i yem?
9. Ipi jeha ahoudoul u panna bei ham?
10. Bible changho seijin.
11. Tulai mi koi tabang in hitia chu Pakai ahou vem?

(Pan nabei).

12. Houdoul adih tah chu ipi ham?
13. John 4:24 jih dohin.
14. Pathien Lhagaova houding ati chu ipi tina ham?
15. Thutaha Pathien hou ding ati chu ipi ham?
16. Pathien in amite koma athum houdoul chu ipi ham?
17. Pathien miten Pathien ahou dan dingu lam pi chu hoiya isimohu vem?
18. Houdoul nga chu seijin.
19. Pathien in tulaiya mihem iti akihou lim pim?
20. Pathien chaten Pathien iti akihou limpim?
21. Awgin zat 2 ipi ham?
22. Pathien deidan awgin (music) chu ipi ham?
23. Pakai jan-an chu ipi ham?
24. Hapta'a ipi nikhoa chu Khristian ho kikhom jiu vem?
25. Pathien houna dinga belap le paidoh chu Pathien goun tailouva kibol thei yem?

* * * * *

SIMMUN KO
HOUBUNG NATOH
(WORK OF THE CHURCH)

Houbung ipijeha dingdet ham? Adoile atup chu ipi ham? A natoh ipi ham? Amudoh theina din Pathien kam changho a ichediu ahi.

Amasa taha eihon ikhoul'u chu Houbung hi leiset lam hautheina natoh ho School kibol ho, Louseng kisemdoh ho tabang ahipoi. Lekha bu kitat kihom doh, kijoh doh ho summu thei nadinga ana kitongho tabang jong ahipoi. Hiche ho jouse aphasoh kei nai, Khristian khat chehin hitabang natoh pha khatcheh neiding hi adih lheh'e. Ahin hichu Houbung natoh ahipoi. Vannoiya Hou hon (houbung hon) chung a natoh hoa alunglut cheh chehun, Pathien in amite a ding atohgoun'a kon lamchoum'a akihei mangtauin ahi.

1. Kipana thupha seiphoung ding.

Khrista'n asolchah ho lhan'a athodoha vana akaltou masangin anahilin ahi. "Hichejeh chun nangho cheuvin namtin a mijouse seijuiyin gasemn, A Pa, A Cha, chule Lhagao thieng minin amaho chu baptize gabolun, chule keiman nangho kapeh thujouse hi abon cha anit dingu vin gahil un; chule vannoi leiset kichai nigeiyin keiman nangho kaumpi jing nauve ati" (Mat. 28:19,20). Chuin aman ajah uva' nangho vannoi leiset gam jousea cheuvin lang thilsem mihem namkim jaha hiche kipa na thupha hi gahil lhangleuvin. Atahsan a baptize chag chu sohcha

ding ahi; atahsan lou vang chu thiemmo changa um ding ahi" (Mark. 16:15,16). Paulin khangdong Timothy hitin ana thapeh'e "thu chu hillhang len, aphot le aphotlou va jong pang jing jiengin; lungnengin hil toh thon lang, athiemmo nau hetsah inlang, sosal jin, chule tilkhoun jin" (2 Tim. 4:2). Bible chang tamtah aum nalai nan, hijongle hicheng hi thubul phu nan, Pakajin kipana thupha hillhang na din eivet sahuve.

Solchah ho khanglaiya Houbungin ipi anabol em? Houbung member hon Pakai yin atohdiuva angaichat ho bou chu anatong uve. Amahon Pathien thu ana sei phounguve. Solchahho thilbol lekha bu hi, hiche a dinga chu, thupi tah, tekah thei bulhing set (dimset) ahi. Miho kikhelna mun jousea thuhilpa khat chun Pathien lungdei lam thu chu ahil ahi. Solchah 2;8;9;10 leh 16 simin. Ahileh aseiphoung leh ahil lhang chu koi hin tam? Jerusalem'a Pakai mite ho nasataha bolgentheiya a umjouun hitin ana kijih'e. "Hijeh chun avah cheh ho chu gamtin'a avahleu vin thupha chu ahille tauve" (Sol. 8:4)

Aban'ah amahon ipi ahilu vem? Chule Solchah bu sunga kikhelna kisei ho banga nangin jong nahet teng nabol dinga kimmelchih ahi. Ahin achom lamtah seidin amahon Khrista Pathien ahi thu, mikhat huhhinga aum nom thu, Houbung thupiye, Pathien houdol dan ho Khristian hinkho thupi yedan ti ho ahideh'e. Paulin "Thingpel thu chu amangthai ho dingin ngol na ahi; asohcha eiho ding vangin Pathien thahat ahi" (1 Kor. 1:18) ana ti.

Pakaiyin athupeh chu (akamchang) seiphoung ding ahi; Paulin tahsan chu Pathien thū jaha kona ahi anati (Rom. 10:17). Khrista amatah in "thutah chu heleu chun thutah chun nalha ong diu ahi ati (John. 8:32). Chuleh "A chutile atahsan lou henga chu iti itao dingu ham? (Rom. 10:14). Atahsan lou ho chu mangthah diu ahi, tia aseih ahi (Rom. 3:23, 6:23); hijeha chu Pathien ngailut na hi seiphoung ding ahi (Rom. 5:8). Huhhingpu chu vetsah ding ahi (Jn. 3:16). Chuleh thua nungho chu achonset nauva kon huhhinga um ding ahivu (Rom. 1:16, 17; Mark. 16:15,16). Pathien hephalou, Pathien lunglam nahsah lou ho (thu'a nunglou ho) chu mangthah diu ahi (2 Thes. 1:7-9). Hiche jeha chu Pathien thu (kamchang) iseiphoung tei tei dingu ahi.

2. Vaicha ho kithopi ding

Pakai kam chang kihil na inei diu chu, Houbung hi kithopi ngaicha tah tahho kithopi ding ahin, amahon hitichun anabol uve. Solchah 2:45' isimdoh uva chun "chule aneiu athil ke'u ajohun, abon chauvir angaichat akin tou khopbep cheh in akihom jiuvin ahi" ati. Hiche hin amaho chang cheh lungthiengsel a apehdohu chu thupi'a aseinom ahi. Koima solvang hilou amachang kipehna ahi. Aban in Sol. 6 a isimdoh nauva Hebrai hole Juda gam Greek ho kah'a kiniel boutam na ahung umdoh in greek meithai ho niseh in notthapin aumdoh tai. Hijehchun Solchah non seijui ho chu akou khoum'un Houbung sunga hitabang thusoh ho

vaihom tup din upa misagi alhendoh uvin ahi.

Jerusalem a mithieng vaichate ho kithopi dinga Paul ache isimdoh uvin ahi. Aman aseina ah, "Ajehchu Makedonia le Achai'ah gama mihon Jerusalema um mithiengte laha migen thei vaicha ho huna'a sumto ding aphantsah tauvin ahi" (Rom. 15:26). Hijeh chun Paulin Korinthia sopi ho koma lekha ajihchun," 1 chule mithieng te dinga tokhom thudolvang chu Galatia Houbungho thu kapeh bang chun, nanghon jong bolun, 2 keima hung teng'a tolom sum kidon lou na dingin, hapta nimasa nileh atojou kham cheh in dongun ana kikhulun" (1 Kor. 16:1,2), anatin ahi.

Kithopi ding chu koipen ham? Amasa tahin, ahidan tah chun, Houbung sunga avat tah tahho chu ahivu. Amaho chu mivaicha ho, Ateh ho, Meithai ho, hetphah lou boina touhho, Nu neilou pa- neilou khristian ho ti ho chu ahi. Gal. 6:10 sungah, "Hiche jeh chun hungum, aphant achang agom kom ineibang dol chehin, mijouse chungga thilpha bolu hite, adehin eima insung mi atahsan ho chungga habol dehu hite" ati. Mijouse chu kithopi ding ahideh poi. 1 Timothy 5 sungah, Khristian tahsan umtah ho sopineilou koitabang ham khat chu amale ama kivesui joulou ho chu kithopi din aseiyeh. Hijehchun Pakai sum chu achang dinga lomlou, athum ho khutsunga lutsah lou ding dan dungjuiya avat tah tahho chungga jahding ahi.

Houbung member ho seh seh kithopi ding ahipon, Houbungin achan dinga kilom ahi, kithopi thei ahi ati, ho chu kithopi ding ahi. Jacob 1:27; bung 2. Hichu kipana thupha miho koma lhuntheina ding doina ahi.

A chutileh hiti hoa manding sumchu hoiya kimu ding hitam? Hichu Houbung mite hon ama lungcham cheha apéh diu ahi. (I Kor. 16:1, 2; II Kor. 9:6,7). Hichun khristian hon hiche dinga chu apéh tah hih uleh Houbungin hiti hoa dia chu ima agoun theilou ding ahi, tina ahi.

3. Houbung khantou sah ding

Houbung dindet sahding, hatsah ding, thapeh ding, Houbung member ho Lhagao lama khantousah ding tina ahi. Hiche ho chu ipi hiding ham? Pathien thua kiloikhom'a houkhom'a kimutoa kon khatle khat kitho khoma chonphatle ngailut tiho ahi. Sol. 9:31; Rom. 14:26; 2 Kor. 8:1; I Thes. 5:11; I Kor. 14:26; II Kor. 12:19; leh Eph.4:12 ho hi simin.

Achai nan, mi tamtahn hitabang natoh len chu vanoi pumpi dinmuna kiloikhom na umlouva Houbung luchang milen khat kilheng doh louva, chule sum mu theina natoh choum-choum bollouva iti hithei ding ham tin, adetmo lhehuve. Ahin Pathien lampi chu hitabang natoh nadinga chu lampi phapen tah ahi. Pathien in ama lungdei banga itoh uleh iphatsei diu, idop sang diu, loupina

ichan diu, hitia chu itohnom u ilungdoi u chu ilolhin sah ding u ahi. Hitabang natoh nadinga chu Khrista chu Houbung ho luchanga panga, eiho cheh jong atibaha pang ihiuve. Houbung in hitia chu member hon aphethei cheh, abol theicheh aboluva kon hitabangho chu atohjou ahi.

Pathien thu seiphoung, mi avat kithopi, Houbung member ho khantou sah hiti ho jouse hi lhagao mangthai huhdoh nading ahin, achaina Pathien in aboncha chungu chu achoisang ding ahi. Houbungin tohding aneipoi, hicheho tilou chun. Pakai Houbung chu Lhagao tipum ahin, vannoiya na atongin, ahin vannoi ta-bang ding ahipoi. Pathien lung deilam hol'a miho ding na tonga thiengsel'a umjing ding, sochat na chu Houbung member jouse ding, hichu asempau loupi achansah nadingu ahi. Hichu Pakai Houbung ahin, anatoh leh Pathien kin abol'na chu ahi.

Thudoh Ho

Dihtah in donbut in:

1. Pakai houbungin atohlou dingho ipiham?
2. Hou na sunga chonset nathei natoh sumtong holna ho chu ipipi ham?
3. Houbung natoh ipi ham?
4. Pakai thupeh Mat. 28:19, 20 leh Mark. 16:16 sunga ipipi ham?
5. Khristian masahon gamdanga ana-thejal'u chu ipi ham?

6. Amahon ana seiphoungu phabep seijin.
7. Tahsan thu iti hung ham?
8. Eiho ipin eilha ong uvem?
9. Huhhing na iti kibol ding ham?
10. Amang thah ding chu koi ham?
11. Angaicha tah tahho kithopi dinga Houbung pang thei ham?
12. Jerusalem a mithieng vaicha ho kithopi nadinga kon adon khom em?
13. Aboncha (avat jouse) kithopi ding ham?
14. Amasa taha kithopi ding chu koi loi ham?
15. Kithopi dingho chu seijin.
16. Houbung polama ho jong kithopi thei ham?
17. Angaicha tah tahho kithopina ding sum hoiya kondoh dingham?
18. Sum chu itih teng don ding ham?
19. Houbung khantou sah kiti hilchen in.
20. Houbung khantou sahna ding thuho seijin.
21. Pathien in iti apachata, iti achoi sang ding ham?
22. Koichu Houbung luchang ham?
23. Houbung natoh doile tup ipi ham?
24. Houbung hi vannoiya ham?
25. Houbungin gamdanga abol chu vannoi kivaipoh na, kiveina ho ham?

* * * * *

SIMMUN SOM

HOUBUNG KIPUM KHAT (UNITY OF THE CHURCH)

Tukhang vannoi houbungho hi atila sangin kipum khat ding thu hi aha ngaito danuvin akimui. Ecumeical kiti vannoi Houbung ho kiloikhom na natong hon muntina miho lunggel (ngaito na) ho aman khomuvin ahi. Hiche hin vannoiya houbung akiha khen thang dan avetsah in, hiche ho suhtup nadinga lunggel natongho jong achol lhagam tauve. Ahinlah kipum khat ding a-itih in apolut thei povin, athuchai nau chu "Kithuto louna dingin akithutouh tauve" (agreeing to disagree) ti chu ahijieng'e. akikhen thangho chu ichan ham khat gei thuho jeh vang chun akipum khat (akiloi khom) theiyun ahi. Hijehchun ipi kimudoh theiyem? Adonbut na chu Bible azou ahijieng tai. Kipumkhat na dihtah chu ahileh mihon (pawia umhon) athuhilu atahsan pomdan'u, amin'u, a houbung u leh tahsan pomdan lekha bu tiho chu ase lhahdiu (adalah diu) angaijin, chujou teng Bible chu akidop uva asimdiu, Bible a kisun chu atahsan diu chule Pathien thua chu nungdiu ahi. Chuteng kipum khatna dih tah Pakaijin John 17 a, atao na tabang chu hiding ahi. Mihon chutabang ahin bol tengu atahsan u kibang hiding, kihilna kibang angai (ajui) cheh diu chule abon chauva tha khat cha vangam a chekhom diu ahi. Hichu mihon mihem nung ajuii chu adalah uva (angah uva) Khrista

nungjui akipatu leh hichu (kipum khatna chu) bailam tah hiding ahitai.

Bible in kikhen chu ademin, ahi. Bible in aseï chu Pathien in sopiho laha kikhenna muchi the thang, ahilou leh kimuda na semho chu athein (amudan) ahi. 1 Korinth bung khat sungah, Korinthia houbung hug kikhen thu eiseipeh uve. "Chule sopite ho, najapiuvin thukhat in longun, nalahuva kikhen na umlou vin lungkhat le thilngaito kitha khatin bulhit'un, tia Pakai Jesu Khrista mina nahenguva kathum ahi" (1 Kor. 1:10) tin Paulin anatemuve. Aban'ah thu thum adongin hiho chu mikhat in alhuh na thei ding achon nauva avetsah na hou ahi. Khrista chu kikhen thang em? Paul chu nangho dinga thingpel chungga kikhenbeh am? Paul min'a baptize nachun'u ham? Hiche donbut naho hi aheth tei dingu ahi. Hijeh chun akikhen nau dinmun chu ahidinga kilom lou ahi avetsah ahi.

Hitabang ma chun Rom'a um sopiho koma Paulin anajih in ahi. "Vo sopite kangeh nau ahi, thu nakihil chengu chu akale a, kikhenchek nadingle kipallhuh na semte ho chu ana melgel un lang, amaho a kon in anachom um un" Rom. 16:17,18). Kolosea sungah ahithi seiye, "Vannoi leiset lekha jembul chu Khrista toh nathi tha piu ahitha'a ahile leiset hinna a hingnalai banga ibola danthu noiya navau ham? hichu thamhih tephih, tongkha hih, ti ho hi (hicheng se chu imanah nachunga mangthah jieng ahi), Hithi ho chu mihem

thuhil choum choumle thupeh ahi". (Kol. 2:20-22)

Hiche kisei kihil naho jouse hi mihema kon ahin, tahsan le thupeh, tilkhouna khutsan na chule Bible nungjui sanga lekha bumihem ho jih nungjui hiti ho hi kikhen na hungkon doh na ahi. Lamkhat in kipum khatna hi mikhat in Khrista nung ajui a kon kinga theibep ahi. (atui, a al kitepkha thei bep ahi). Khrista taona ah 20 "Hiteho cheng jieng dinga tao kahipoi, amaho thu'a kona keima eitahsan ho jouse dinga jong, 21 amaho chu pumkhat ahi nadinguva, Pa keima nangma sol kahi hi vannoi miten atahsan thei nading uva nangma keiya naum'a keima nanga kaum banga hi, amaho jong einia aum theina dinga katao ahi" (John. 17:20,21). Khrista hi ahitheilou dinga tao ham? Ahi nai sai poi. Dihtah a kichen tah a hichea chu kipum khat na um ahi. Itih tah leh? Khrista nung ijuu tengu. Mihem thuhil in ei sukhen uvin, Bible thuhil in eikipum khat sah uve.

Eph. 4:1-6 sunga kipumkhat nading lim eikiseipeh uve. Veu hite" 1 Chuti ahi jeha chu Pakaiya sohchang keima nahenguva kahung tao ahi, nangho nakikou nautoh kitouh in chonun, 2 chon nemna bukim in lungnem toh, thohhat toh thon chonun; ngai lutna in khatle khat kingai themun, 3 chamna in kikanun, Lhagaova pum khat hina ding in kiha bolun, 4 Tipum khat ahin, chule lhagao khat ahi; hiche banga chu nakikou'u jong chu kinepna khat'a kikou nahiuve. 5 Pakai khat, tahsan khat, Baptize chan khat ahi. 6 chule mijouse Pa le Pathien khatseh

bou ahi. Ama ima jouse chung a ahin, hoima jouse chung a um ahi, chule lungsung jouse'a um ahi." Hetding chu hiche hi kipum khat nading'a temna, taona ahi, Kihil naho jouse hi aboncha khat ahi. Hiche kal val'a kon lunggel amudoh thei ding ham?

Houning kipum khat nading thu'ah, Pakai Khrista'n Ka Houbung kasah doh ding ahi, tia aseina ah akimudohe (Mat. 16:18); hichu Khat, Lhagao tipum khat tina ahi (1 Kor. 12:27) chule ama chu aluchang chu ahi (Kol. 1:8). Koima chan Khrista'n tipum 2 Luchang 2 aneiy e tia angoh theilou ding ahi. Houbung limchu Pathien inn leh Pathien insung mi'a imuthei'u ahi (1 Tim. 3:15). Achuti le inn izat, insung izat umem? Khatseh bou ahi. Pathien lenggama chu Khrista chu leng ahi. (Jn. 3:3-5; Kol. 4:11; 1 Tim. 6:15). Lenggama izat Leng izat umem? Khatseh bou (hiche-thua hin) aum'e.

Adihtah chu ahileh, kikhen na sung a um pawlho thuhil leh Bible hi kikal ahi-tai. Lamchoum khatah, alim dan chu kipum khatna, khat hina, chamkim na chule apumpi khat hina kitiho hi thakhat ahi. Bible in houbung chu houlam mihon amaho chon dan a het hahsa a aseiu tipum in aseiu poi. Houbung chu huhhinga umho, kikou doh ho Khrista thuhil ngai hoa kon kismdoh ahin, Khrista'a ahi. Khrista chu akikhen pon A Houbung jong akikhen poi. Akikhen nomho le kikhen na sung a thuneiho chu Khrista tao na thuleh ama chung a langpang ho chu ahiuve.

Thudoh Ho

Dihtah in donbut in:

1. Houbung kipum khat na dinga tulaiya thum (tao) um em?
2. Kipum khatna dinga lunglut na thu kiphoung doh ho ipipi ham?
3. Kinopto lou nadinga kinopto houbungho chun kipum khat nadinga ipi apohlut jiuvem?
4. Kipum khatna dinga adonbut na chu ipi ham?
5. Kipum khatna dinga mihon aselhad diu chu ipiham?
6. Eiho pumkhat ihi nadiuva kon eitao peh uvem?
7. Kipum khatna ga (result) chu ipi ham?
8. Bible in kikhen na adem em?
9. Pakaiyin amuda koi ham?
10. 1Kor. 1:10 jihin.
11. Korinthia Houbunga Paul thudoh thum seijin.
12. Melchih a umho loi chu koi koiloi ham?
13. Amaho kon akin u abol em?
14. Amaho chu ipel diu (idalhad diu) ham?
15. Pan nabeiya Pathien hou chu koi ham?
16. Khrista chu ipi dinga tao vem?
17. Ahithei lou dingpia tao ham?
18. Kipum khatna ding lim (formula) seijin.
19. Izat um em?
20. Khrista'n Houbung izat atun em?
21. Houbung kiti ipi ham?
22. Aluchang koiham?
23. Khristan tipum khat val, luchang khat val, aneyem?
24. Insung izat Pakaijin anei yem?
25. Pathien kam changin eiki pumkhat sahuvem?
Eiki khen sah uvem?

* * * * *

SIMMUN SOMLE KHAT

HOUBUNG TAHSAN PHOUN DOH (CREED OF THE CHURCH)

CREED kiti kampao hi Latin pao CREDO a kon hung ahin, aseinom chu, 'Tahsan, houlam tahsan khat kisedoh thunei na', Tah san phoundoh na khatpen pen kijih doh tiho chu aseinom ahi. Mikhat in 'Creed' akitileh Solchah ho tahsan (Apostles' Creed) Nicene tahsan (Nicene Creed) ti hi atamjon ageljin ahi. Ipi chu hitajong leh khat cha chu Bible ah akimupon ahi. Chukey hilou vin mihem sem Houbung achun tahsan thu'a kibol (goutchoum'a asem'u) khutchoi bu, Dan bu, tahsan phoundoh na tiho anei uvin hiche ho chu Pathien thu abelapu jieng ahi.

Creed khat'a Bible thu atam seileh Bible chang tamjao, alhom seileh lhom jao, apumsei louleh panna bei ahitai. Ahin eihon Bible inei jing uve. Thup. 22:18, 19; Gal. 1:6-9, hiche ho hin Pathien thu hi belaplou ding, lahdoh louding chule akheel'a adang lhehlou ding tin giltah in aseiyee. Adang sungah Pathien thuchang (Bible chang) hi alhingset ahi, ati. (2Tim. 3:16,17) acham kim'e (Jacob. 1:25); eihon isei diu chu Pathien thusei bou ahi (1 Pet. 4:11). Hijeh chun thunei tah'a jah dinga belap ding lekha bu dang angai poi.

Tulai vannoi houbung hon Pathien thu (kam chang) ajuvilou jehuvn akikhen thanguve, ajehchu amahon mihem sem tahsan (creed) akhutsan jehu ahi. Houbung (pawl) khatcheh in amaho len nai kipoh

na dan (rules) aneiu hi dem (niel) ahi. Hiche sunga lut ho chun Bible chu adalha tauve. Iti lhaset um hitam? Hijeha chu ngeh nom (tao) na chu mihem semthu lekha bu ho dalhah'a Pathien kamchang Bible lam'a kihei ding thu hi ahi. Hichun eikikhen sah lou diu Jesu Khrista sunga ei kipumkhat sah joh diu ahi.

Pakai Houbug Tahsan bu (creed) chu ipi ham? Eihon Khrista tailou Huhhingpu adang ineipouve, Bible tilou Tahsan bu danjong ineipou ve. Eiho deidan le lunggela hou thu chu aman umlou ahi (panna bei ahi). Eihon eiho lennai ya ikiledoh u (Bible kheel) aumpoi. Eihon ibon chauva ineiu chu Bible ahi. Eihon Bible thuhil ingaijun, midang jong iseipeh uve. Keihon kathum'u chu ahileh ibon chauva Bible isim diu, ijildiu chu ahi. (Jn. 5:39; 2Tim. 2:15). Katao nau chu hoiche muna um koi hijong leh Bible in eihil nau bangin bol'u hite.

Eihon juidingin akibelap lekha bu ho ineipouve. Mihing khat jihthei lekha bu le dan ho chu Pathien Bible to kikitin itahsan pove. Mikhatin thunei taha lekha bu khat ajih theina ding Pathien in apepoi, ti itahsan uve. Bible toh kitouh thei ding (ki kotding) lekha bu khat jihna dingin koima lhagao thieng akichoum peh poi.

Pathien kamchang chu Pathiena konbou hung ahin, hichu Pathien huimut khuma (haikhum)'a kon ahin, hichun eiho ei huhhing uve. Chugouh hilou vin hiche Pathien thu (kam chang) chun achai nileh ichung thu'u atanding ahi (Jn. 12:48). Thutah hungkon na nahetlou leh Thutah nahet lou ding ahi. Hijeha chu Thutah na tahsan na dinga thutah najah angai ye. (Rom.

10:17). Hou thudol'a mi atamjo lhez lhah'a aum hi detmo ding ahi poi. Mihem ho chu kithopi ngaichat nan Pathien kom'a chesangin, mihem kom joh'a achejiuve. Mihem ho chu Pathien Bible'a kihei sangin mihem thuhilah akihei jo'uve. Chen tahin mihem chu huhhing nadinga Bible'a akinungle (nungche) tei tei ding ahiuve.

Koi hijongleh Houbung thutah thu hetna dingin Bible'ah che hen, ti hi katao nau ahi. Leiset chungah Houbung lhem tamtah aume. Hoiche pen chu adih ham? Houbung khatcheh chu achoum cheh'a khoulding ham? Ahipoi; Houbung adih kisei na Bible a chu che ding ahi. Khatvei pakai Houbung adih namudoh chu hoiche mun ahi-Bible in nahil nabanga najui ding chu hahsa talou ding ahi.

Kathapeh nom nau chu thutah jilna dinga Bible'a nache ding ahin, hiche bou'a chu huhhing na um ahi. Mihem thuhil na-ah huhhing na thei ding lam tamtah aume. Ahin Pathien lekha bu'a nache leh namu doh ding chu Thutah najah tei ding, na tah san ding, chonseta kon na kisah ding, Khrista naphoun doh ding chule chonset suh beina dinga baptize nachan ding (Mark.16:15,16; Sol. 2:38) ahi. Mihem ho seito ipi kikhel em? Pakai chu huhhing na pethei ahin, mikhat in ajaha atahsan (thu angai) leh huhhinga um ding ahi.

Pathien iti houding ham? ti het nadingin Bible'a nungche ding in kathapeh nome. Mihem seito kikal del ding ahi. Pathien hou nading lam tamtah aumpoi. Bible in lamkhat seh ahilin, hichu adeha Pakaijin anasei chu ahi (John. 4:24).

Hichengho seh hilou vin, huhhing na thua

jong kasei nome. Hiche thudol a jong thutah kisei na Bible'a bou che cheh din katilnom uve. Tuhgah na noiya kon apot doh dohin koiman Bible ahethi poi, kichehtah'a abang banga aheth lou ding ahi. Hitabang dinmun'a um chu dihlou ahi. Melman Bible'a kon mi agamlat'a, amanthah ding adei ahi. Ahin huhhing nadinga hi a chu hung ding, chuteng le hou thu-in apui na lamho a chu cheding ahi. Chujou teng bou huhhinga um ding, hitia bou chu adih amu ding ahi.

Itahsan'u (creed) ipi ham? Jesu Khrista le akam chang (athu) bou ahi. Ama tilou adang aum poi. Eihon Ama Pathien chapa ahi tin ei tahsan un, ama thu chu achaina ahi. Eihon ikhut san'un, ama nung bou ijuu uve. Eihon midang jong hitabanga bol ding chun itil uvin ahi. Mihem tahsan thu (creed) in munkhata napuilut ding hichu damun (hell) ahi. Jesun "Keima lampi, thutah, chule hinna kahi, keiya chelou koima Pa kom alhung thei poi" (John. 14:6) ati.

Thudoh Ho.

Dihtah in donbut in:

1. Creed (tahsan) kiti ipi ham?
2. Pawl hon ipi aneyu vem?
3. Pathien thu abelap, apaidoh ho itidiu ahi atim?
4. Pathien thu Bible lhingset em?
5. Chamkim kiti ipi ham?
6. Eihon iti isei diu ham?

7. Thunei nale belap lekha bu ho nei ngai yem?
8. Tulai vannoj houho ipijeha kikhen hiu vem?
9. Bible in eiho ei khen uvem?
10. Pakai Houbung Tahsan (creed) chu ipi ham?
11. Eiho lungdei le lunggel chu ipito kilom em?
12. Eiho kiledoh (Bible choum) dih nan tem?
13. Mihing jih lekha bu chu Bible to kikot thei nan tem?
14. Pathien in Bible to kikot dinga lekhabu jih theina tha koi tabang apeh em?
15. Pathien kamchang (thu) hoiya hung kon ham?
16. Ipi kamchangin nikho nunung leh ichung thu'u atan ding ham?
17. Thutah ipi ham?
18. Koichu kithopi dinga chie-em?
19. Houbung chung thu dihtah hetna dinga ipi lekhabu sim ding ham?
20. Huhhing nadinga lam tampi umem?
21. Bible in huhhing nadinga ipi ahil em?
22. Pathien houna dinga Pathien in akamchang iphoundoh pehuvem?
23. Bible het thei ham?
24. Bible abona ihet theiu vem?
25. Vangam chena ding lampi khatseh chu koi ham?

* * * * *

SIMMUN SOMLE NI
Houbung Thusim
(History Of The Church)

Solchah bung 2 sungah, Pakai lenggam ahilou leh Houbung kipat na ahung kitun doh dinmun umdan akimudoh in ahi. Solchah ho Jerusalem khopia aum un, Lhagao thieng achung uva buhlhah in ahung um in, namtin a kon hung kikhom ho jong chu Pentcost nia pat aki sukhom tauvin ahi. Hiche Penticost nia thilsoh hi Joel thiemgao vin ana seisa guilhung ahi, tin Peter le solchah hon ahilchen un ahi. Kisih na thule chonset ngai dam na thu chu hillhangin aum in, Lhagao 3000 in kipana thupha kisei chu ajaovin baptize ahangun, Pathienin amaho chu A Houbunga abelap tai. Hiche jou chun Kpiana thupha chu Jerusalema kipat Judea gam, Samaria gam chule achai nan vannoi leiset koulkim manggeiyin vannoiya um thilsem jouse henga seiphoungin a um tai (Sol. 1:8; Mat. 28:19, 20; Mark. 16:15,16; Kol. 1:23).

Solchah ho khangin Houbung chu man gang tahin, gamtin a, akhangtou vin ahi. Paul hungkikhel jouvin Pathien thuseiyin gam vei thum akhoul in Judah (Jew) ho komkeu hilouvin chidang nam dangho kom geiyin kipana thupha aseiphoung in ahi. Hiti chun mi tamtah ahung kikhel in, Pakai Houbung (congregations) tamtah Asia gamle Europe (sap gam) geiyin tundoh in ahung um tai. Hichu baitah thil ahi poi. A jeh chu bol gentheina nasa tahum'ah

ahi. Amasan Houbung chu Jerusalem'a bolgentheiyin aumin ahi. Hijeh chun Seijui ho chu gam tinah akithe thangun, alhun na tin'uva kipana thupha chu aseiyun ahi (Sol. 8:1-4). Phat phasah ahung chen, Rome sorkar in athuboi ho'u tamtah chu Khristian ho amoso'u vin Rome a kipat Rome gam kai pumpia kichep na munle thilha houna mun'a tanti apeuvin amaho nopsah nadingin amang chauve. Achai nan Paul chu Rome khopia achung thu khoul dingin aman'un apui tauve. Leiset lam thusim hon eiseipeh uva chun John tilou solchah jouse chu Khrista jalin akithat (Martyred) sohkei uve, ati. Khristian asangsom asangja tilou, simjou lou vin ahin kho'u ana pedoh uve.

Bolgenthei na aum vangin Houbung chu akhang touvin, gamtin na alhungin ahi. Bolgen theina seh hilouvin nasatah in thina geijin Houbung asumangun ahi. Ahin Houbung chu amaho le amaho akivengtup un ahi. Solchah Paulin lhuh theina ding ni khoa thusoh ding thu ana maseiyin ahi. Pakai Houbung sunga member ho bolkel na a kon'a manthah (lhoh manga aum diu) na alhuh diu jong amaseiye. Ama sei chu ahileh " 1 sopite ho i-Pakaiyu Jesu Khrista hung dingle amakoma ikikhop dingu thudoul'a hiche a hi nahenguva kahung tao ahi. 2 Lhagao khattou sei ahilou le keiho sei hi ahi tia, thu kiseiya kon in hijongleh keiho suthi ahi tia, kei lekha thot khattou ahim'a kon hijongle lung ling laoloi hihun; Pakai

nikho chu ahunglhunga ahitai, ti gellou jehun; lungjong lunggim hih helun, 3 Koima ima chan kilheplhah sah hihun, ajeh chu lhah mang na hunglhung masa ding chule dan susea chonse pa, mangthah chapa chu hung kiphoung doh ding, 4 ama chun dou apat ding Pathien min pujouse le houjouse chungga ama kichoi sanga Pathien Houin san a jong hungtou va hungki pathien sah ding ahi nalaiye. 5 Nakomuva kaum laiya hiti thuho kasei jouse chu nagel dohlou vuham? 6 Chule ama chu ama phattah a aki phoundoh ding, i pin akham ahi nanghon naheuve. 7 Ajehchu dan suhsetna thuguh chun tua jong hi na atoh jingsa ahi; Lah manga aum kahsea hi atuh tanga khat um'a ahibouve. 8 Chule hiche teng chule dan susea chu hung kiphoung doh ding ahi; ahinla Pakai Jesun akam hua ama chu atha a chule ama hung kilaha chu asuhmang ding ahi. 9 Hiche pa hung chu satan natoh dungjuiya thil bol thei thahat le melchih na chule jouthei kidang bolcheng se toh hung kitho ding ahi. 10 chule amangthah ho chengse chu chonphat louna jousea duha lheplhah a um ahiuve; hichu ama hon huhhinga aum nading uva, ngailutna thutah chu alahlou jehu ahi. 11 Chule hiche nadinga hi Pathien in amaho chungga chu sukhel lamvaina natoh alhunsah ahi; chutia chu amahon thujou chu atahsan dingu; 12 thutah tahsan louva chonset alunglam hijo ho jouse thu kitan ding ahi"(2 Thes. 2: 1-12).

Ephesus khoah houbung upa ho (elders)

kom'ah Paulin hitin aseiyé. "28 Hijehchun Pathien in athisan a achohsa Houbung vah dinga achunguva lhagao thiengin napan sahu kelngoi hon changse chung lehnangho chung changa ching thiyun, 29 Kache nungle ngei gilou nalahuva alut'a ahon hi ahoilou ding kahei; 30 Chule nangho laha kona jong abang bang potdoh'a amaho nung chu ajuina dinga, aloilut nadinguva thu akaleh a hila hung um ding ahi, hiche jong hi kahei. 31 Hijeh chun nangho kiging pha jingun chule keiman kum thum sunga mitlhi puma asun ajana nangho nabon chauva tilkhou ka hai louhel chu geldoh jingun" (Sol. 20: 28-31).

Phat sottah Houbung chu catholic houbung in thunei tahin lengvaipoh in apon ahi. Hiti kumsot tah thanei na noiya aum chu kbothim kumsung (dark ages) tia het ana hi. Hitia aum na ajeh chu Catholic houbung in milham hon Bible asim ding chu ajadau vin, thiempu ho (priest) bou Bible sim dinga lom ahi; amaho bouvin Bible ahét jeh uvin, chule amahon mipi aseipeh diu ahi, atiu ahi. Adih taha chu hichu amahon mi ho aseí nom nomu aseí theina diu adoí ahi.

Hiche phat sung ahin catholic houbung chu 2 in ahung kikhen un, Roman le Greek ahi. Akikhen nau ajeh chu baptize-thetho le machine (music) kijang thujeh ahi. Hiti phat lai tah chun Roman catholic houbung in meeting len (council) abolun, amaho jahnóm tahsan thule thuhil ho abelapu'n ahi. Achai nan kum 1500 kum lam chun catholic houbung

sunga tahsan phalou le chondan dihloou ho jehin, Martin Luther kiti thiempu khat in houbung chu semphat ding lampi ahin holpan tan ahi. Ipi chu hitajongleh, ama jong alui khata kon hung kikhel ahin, ama ngaito leh aman chon na le juiding, tia ahilho bou chu adih ahi, atikit ahi. Hiche kalval chun reformation movement, Protestantism kitiho ahungum dohin, tulaiya ihetu pawl ho natoh zatchoum choum ho ahung pengdoh kitin ahi. Luther in Bible'a kinunghei ding ti chu pontho taha anatoh khat chu ahi. Ahinla dei bangin ana lolhing dehpoi.

Kum 1700, 1800 sung hi Europe le America gama pawl sunga um miho kikhen naleh kineil bautam na-a aboi lai tahu ahi. Hichun ol olin ahung kipan un, adihloou ho chu ahin dalhauvin, Bible lam (thutah) ah ahung kipumhei thei tauve. Amaho ngaichat chu Houbung thah khat tundoh ding ahipon, Bible sunga amudoh banguva khat hina ding chu atup'u ahi. amahon hitichun ahinbolun, hichea kipan chun Thulhun thah Khristian dih tah (thiengsel) hiding chu vannoiya jahsah'a, mi asangsom asangjan mihem thuhil adalhauva Pakai Houbunga Khristian komkoma member-a ahung pandiu, chule amaho lamhil (apui diu) chu Bible bou hiding ahi, ti chu ahi.

Khristian ho (vannoi muntim'a thutah sei ho) chu Africa, India, Russia, Poland le gam choumchoum tamtah'a Houbung thieng chu ahin tungdoh tauvin ahi. Hiche Houbung chu tun akitung doh tan, a-imatih

chan'a det jing ding ahitai. Hiche hin khonung masa chu nungjui talou dingin Houbung masa Biblea kimu khatseh bou nung chu juiya hichu phoundoh jing ding chu ahi. Bible a kimu Houbung limleh chonna ho chu ijui'u leh eiho Pakai Houbung ihi dinguh ahi. Muchi chu Pathien thu ahi (Luke. 8:11), muchia kon ahung gadoh ding chu (asem doh ding chu) Solchah ho khanglaiya ga doh tabang chu hiding ahi. Khristian ho chu Khrista Houbung a member ahiuve. Eihon ihetu chu Pakai lenggam chu a-itiha dingdet jing ding ahi. Hichu akitun doh na hoiche mun hihen itih phata kitungdoh hitaleh hichu chejom jing ding chule a-itiha dingdet jingding mihem hihen, Satan (melma) hijongleh asuh mang theina tha kipelou ahitai. Hichu Pakai lenggam a Houbung akipatna kipan achaina togeiya galjou hijing ding, achaina Pathien in a-imatih achenpi jingding ahi.

Thudoh Ho

Dihtah in donbut in:

1. Pakai Houbung kiphudoh thusimchu Bible hoiche muna imuvern?
2. Hoiche khopia hung kiphutdoh ham?
3. Hiche phattah a chu mi izatin Houbung ahin belap em?
4. Hoilai mun danga jong kipana thupha kihil em?
5. Paulin Pathien thusei na-a gam vei izat achot em?
6. Paulin Jew(juda) ho bou ahil ham?

7. Paul natos jeha Houbung kitun na gamkai 2 chu ipi gam gamham?
8. Seijuiho akithe chehuva chu ipi abolu vem?
9. Pakai Houbung kon abol genthei yem?
10. Solchah ho izat tahsan thujeha kithat em?
11. Bol gentheina aum vanga Hounung chu khangtounam?
12. Nikho nunung lamding thu-a Paul in ipi anasei yem?
13. Houbung kipat tila iti ana kidem em?
14. A.D. 606 a ipi soh em?
15. Pakai Houbunga ipi sohem?
16. Ipijeha kum tamtah chu kiothim (Dark ages) kiti ham?
17. Catholic houbung kikehso 2 chu ipi ham?
18. Roman Catholic sempha nom koi ham?
19. Ipi jeha asem phat nom ham?
20. Ipi natos ho (movements) hung umdoh em?
21. Houbunga nungche ding atiu chu lolhing nauvem?
22. Kum 1700, 1800 sunga ipi soh em?
23. Miho chun Bible dungjuiya Pakai Houbung lim aboluva chu Houbung thah asem u ham?
24. Vannoi chun Bible dungjuiya Pakai Houbung lim aboluva chu Houbung thah asem u ham?
25. Tunia Khrista Houbung dihtah chu um (dingdet) hinam?

* * * * *

SIMMUN SOMLE THUM

TUKHANG HOUBUNG
(THE CHURCH TODAY)

Pakai Houbung chu achesa kum 2000 tabanga ana kiphutdoh ahitai (Sol. 2), hichu tuni geijin, abang bangin aumjing in ahi. "hichu iti hithei ding ham?" nati thei ahi, Hichu Thulhun Thah houbung limdol taha kidang lou taha (simply) chelha ahi.

Dan'a gahtaha kipo Houbung noiya um houbung kim khat ho chun Penticost nia kipat tuni changeiya Pakai khonungjui ho, Houbung kipat tila banga kitungdoh Houbung chutoh thakhat ahina ding pohdoh anom jiuvin ahi. Ipi hitajong leh, hichu adih thei poi. Amasatah dinmun in, Pakai thusei eihon ineiyu chu alenggam chu koiman a-itih'a asuhset thei lou ding, atonsot a dingdet jing ding ahi, anati (Danl. 2:44; Luke 1:33; Heb. 12:28). Aseinom chu Houbung chu vannoi leiset hoimun hijong leh aum na chana chu Hou-bung kipat tila banga (kibang cheta) tunia jong um tei ding ahi, tina ahi. Hitabanga umlou muntina um houbung ho chu hitabanga adih ding angaiye. Achoum dang khatin; eihon lenggam muchi ineiue (luke. 8:11) Thulhun Thah Bible changho chu ijuidiu (ichintup diu) angaiye. solchah ho khanglai Khristian hon ga aso hou chu tulai khristian hon jong ga iso teidiu ahi. Solchah ho phatlaiya Christian hung

soh hon anabol doh hou chu tulai khristian honjong hitabang ma'a chu aboldoh diu ahi. Chuti ahijehin. Thulhun Thah Houbung umna muntina Pakai Houbunga hithei chu adanga jong hithei ding ahi. (Thulhun thah Bible in aseï бага hithei tei ding ahi)

Pathien in amiten ajui diu lim a-imatihin akoiyin ahi. Aman, Noah kong sah ding (bol ding) lim ajuidin anapen, (Gen. 6) Moses maicham ponbuh sahdoh lim ana pei. "Chingthei yun, vetkah dinga molchunga nakivetsah limbang bang chun bolsoh keiyin tia aseï banga chu Van 'a thil lim danle ale ahibouve." (Heb. 8:15). Chuleh Thulhun Thah sungah Pakai Houbung limdan lhingset in ineiue. Noah le Moses chun amani kivetsah lim banga jui ding chun ana ngah lhonin ahi, hibang chun eihon jong Houbunglim chu ijui tei dingu ahi. Noah le Moses in Pathien limpeh kong le Houbuh anajui lhon bang chun, Pathien in phat thei anaboh lhon bang chun, eihon jong Pathien Houbung limchu juileu hen Pathien lunggel banga belap, lahdoh umlouva Houbung chu ahina banga ijui'u leh (idin detu leh) Pathien in phat thei iboh diu ahi (Thup. 22:18,19).

Houbung limso dan melchih naho chu Thulhun thah Bible sunga chen tahin akimuthei yin ahi. Pakaiyin Houbung chu ipi ahi, Koi tundoh a hi, hoiche muna hung kitung doh, itia'a hung kitung doh, amin chu iti kihet em? a member ho min.

member ho chu iti hung hi iti houkhom jiu ham? A natos ipi ham? ti ho chu Pakai yin eina seip eh uve. Chule a luchang koi a hi, aman chu ipi afeh ahi, ahuhhing pu chu koi ahi, tiho jong anasei ye. Anatos le athilbol tahsanlal hodingin mun aumpoi, ti jong anasei ye. Pathien thusei akicheh bangin Houbung lim jong akichehe.

Hijehchun, Bible in aseihoubung dih khat seh chu ihet nom uleh ibon chau va Bible ijil dingu angaiye. Eihon thutah chu ijil tengu le, chule ijui tengule a member ihung hidiu, Pakaiyin anatun doh a Houbung masa chutah kibang ihidiu ahi. Muchi chun ga ahin nei teng Pathien thu chun Khristian ho chu aga dohsah teng Khristian ho chu massanga ana umsa Houbung banga Pakai Houbanga chu member hung hiding ahitai. Khrista Houbung chu vannoi leiset pumpia akimu theiye. Hikom ahin, mun chom choum ahin akimu theiye. Mihem hon Bible sei bang (hil bang) a, abol tengu muntin leh phattina hung kitung dohji ahitai. Mihem hon Pathien thusei tabanga tohding adalhah tengu vannoiya Houbung natos (tundoh ding) chu kinga ding ahitai.

Christa Houbung chu akhangtou jingin Pathien-thu jong gam tin alhungin, hichu Bible thuseh a nunjeh ahi. Khristian kikhen thangle mihem kithanget chu adime. Hiche hi Houbung khat seh Bible nasima namudoh chu ahi. Hichu pawl khat, ahilouleh pawl ho kiloikhom

(pangkhom) ho chu ahipoi. Protestant, Catholic chule loichoum choum kiloikhomjong ahipoi. Ahileh ipi hitam? Baicha khena muthei, sei thei Pakai Houbung chu ahi. Hiche hi alhingset ahi.

Pakai Houbung in leiset lam luchang le munpi (headquarters) aneipoi. Hichun mihem adom sang poi. Hichun leiset lam chihna akon, leiset lam kiloikhom na phatah (sangtah) anei poi. Local Houbung khat cheh hi jalen taha kivaipoh ahin amaho cheh upa (elders) ho, Lhacha ho, Pathien thusei ho, Mihil ho, le member ho umcheh ahi. Houbung member khat chua adang khat chung vum'a kidom sang deh lou ahin, atila pat a (Hou-bung kiphutil'a pat a) Hou lamkai-kulu-(clergy) leh milham (laity) tia anaum dehlou ahi.

Khrista Houbungin a- itih in kidoupi (melma) ananei jingin, tunichan geiyin jong aum in ahi. Hou kiloikhom na choum choum hon alang panguvin, ajeh chu amaho dan juilou jeh chun Houbung chungalung na'u vin ahi. Pathien jalin amaho Houbungin akiloipi nom pon, donse louvin aum'un ahi. Mikhat in Bible nung juidinga hataha akigout leh amahon mihem thuhil hojoh jui dingin hatahin (chihna thun) pan alajiuvin, ahil jiuve. Amahon Khrista min aput uva ama nungjui asuhmil lou tengu pawl miho chun mihem ho min apuvin mihemho nung ajuiuve. Amaho khut choi chu adih pon Khrista Houbung douna ahin,

mihem ho lung anatsah jiuvin, atongkhel jitaue. Hijehchun anatong hon jong panna beiya atohu ahi.

Pakai Houbung chu akhang akhangin galjou ahung hipehin ahi. Hiche leiset gal jouse le damun (hell) mi,diabol (devil) hon asutang jou povin ahi, akim apama umho toh tekah (vetkah) din lhomcha daniu kihe jongleh hiche honlhom ho chu huhhinga umdiu ahi. (Mat. 7:13, 14). Khrista'n Houbung khatseh aneyin, hiche Houbung dinga chu khatvei hungkit ding ahi. (Eph. 5:27; John, 14:1-6). Ama chu ama lenggam dia leng ahin, Pathien koma amaho chu puidoh dinga hungkit ding ahi. (1 Kor. 15:24), aman mou khat (bride) bou aneyin (Thup. 21:9), ama ahungkit teng hiche mou chu akisan ding ahi. Hiche mou chun ama min aput ding ahi. Adangho chu itiding hitam? Aman amaho chu aneil ding, imatih'in kathei khapoi atiding ahi, amaho chu aphunga abodoh ding ahi. (Mat. 15:13), chule akhop khoma meiya ago vam ding ahi.

Kathum nau chu ahileh, Thulhun Thah houbung thienga na um ding chu ahi. Pathien thu'a kile heijin lang, hichu lam kihilsah in. Bible nahetleh Thutah nahet ding ahitai . Amasei tabagin chonle chun huhhinga naum ding ahi. chule Pakai Houbunga belapa na um ding ahi, hichu Bible a nasim thu khatseh chu ahi.

Khrista Houbunga member nahi hihlai leh

member hi nadingin kahintil (thapeh) nahi. Pathien tahsan in, nasetna hoa kon ikisih in, Khrista chu Pathien chapa ahi tin phoung dohin, chule baptize changin, huhhinga naum thei nadin, (Mark. 16:16; Rom. 10:10; Sol. 2:38). Chuteng Pathien in a Houbunga nabe'n tin, khristian khat nahung hi ding ahitai. (Sol. 2:47; 11:26). Chutabanga chu nabol ding ham? Koima chan nangma chu tantia nabol sah lou ding ahi. Ahin Bible nasim (najil) vangle natahsan ding, Khristian nahung hi nom ding katahsan un, nahinkho aum laichengse chu khrista dei banga manchah nadinga pan nalah'a gamtin ama lenggam dia nakehlet ding ahi tai.

Thudoh Ho

Dihtah in donbut in:

1. Itih laiya Houbung ana kitung doh hitam?
2. Houbung chu tua jong um jing am?
3. Mikhatin kumzabi tamtah galkaiya Pakai Houbung chu hiche ahi, tia Houbung khonung chu ate theiyem?
4. Lenggam chu ichan geiya kitung ding ahi, tia Pakaiyin aseiyem?
5. Lenggam muchi chu ipi ham?
6. Muchi chu tunia iti aga sah uvem?
7. Noah leh Moses chu ipi kipe lhon em? seiyyin.
8. Pakai Houbung lim chu hoiya kimu thei yem?

9. Pakai Houbung dinmun dan kimel chihna chu hoiya kimu theiyam?
10. Houbung khat seh chu eihon iti ihet diu ham?
11. Bible a um Houbung khat seh chu eihon iti ihet diu ham?
12. Khrista Houbung chu tunia hoilaiya imu thei'u vem?
13. Houbung chu pawl (denomination) ham?
14. Leiset lam luchang le munpi aneyem?
15. Houbung gal (melma) chu koi ham?
16. Amaho khut choi chu ipi ham?
17. Kum tamtah sung Houbung in gal akijo em?
18. Christa ipi dinga hungkit ding ham?
19. Keiho thum chu ipi ham?
20. Mikhat Khristian le Christa Houbunga member khat ahung hina dinga vat kalbi ho chu seiyin.

Adih, adihlou koul khum in:

Adih Adihlou : 1. Khrista tundoh Houbung chu tuni geijin adet jinge.

Adih Adihlou : 2. Houbung dih khatseh aume.

Adih Adihlou : 3. Hichun Khrista min apun ahi.

Adih Adihlou : 4. Hiche member khat chu huhhinga um ahi.

Adih Adihlou : 5. Khrista a Houbung dinga hungkit ding ham?

* * * * *

BEITA.